

خلفه الستار

أ. منى العيوطي

اسم الكتاب: خلف الستار

اسم الكاتبة: منى عطية العيوطي

تدقيق وتنسيق: نورهان هاني

تصميم الغلاف: مي مجدي

رقم الإيداع: ٢٠٢٤/٣١٢٤٢ م

الترقيم الدولي: ١-٦٣-٨٧٩١-٩٧٧-٩٧٨

كافة الحقوق محفوظة للناسر والمؤلف

لا يُسمح بإعادة طبع أو توزيع أي جزء بأي طريقة، بما يشمل ذلك التصوير أو الطباعة أو التسجيل الصوتي أو أي وسيلة أخرى إلكترونية أو غير إلكترونية، دون إذن كتابي مسبق من الناسر، ويسمح فقط في حال الاستعانة ببعض الفقرات لغرض النقد والدراسة، طبقاً لما تحدده قوانين واتفاقات حقوق الملكية الفكرية

خلف الستار



مؤسسة
الكاتب
العربي
The Writer Operation

إهداء

إلى القلبِ الحاني، الذي تسبقُ دُمُوعه كلماته تأثراً، ، الذي كان
رغم بساطته شغفاً بتعليمنا ومُتحرِّياً بِصِلايةٍ لِئلا يَصِلَ جَوْفُنَا
إلا الحلال ولو كان بَسِيظًا .

أبي الحبيب رحمه الله .

إلى المُربيةِ بِالفطرةِ الدَّءِوبةِ المُتفانيةِ،
الصوامةِ القوامَةِ صاحبةِ الوجهِ المتلألئِ بِخلوةِ الرحمنِ،
أمي الحبيبة حفظها الله .

إلى مَنْ أنعمَ اللهُ عليّ به رَفيقًا للطريقِ،
رجلاً وصاحبًا أمينًا وسندًا راسخًا أتكى عليه حينَ تعصفُ بي
رياح الحياة .

زوجي الحبيب حفظه الله .

إلى صاحبِ القلبِ الطيبِ والعقلِ الرَّاجِحِ والخُلُقِ الرَّفيعِ
من علمني حُبَ القراءةِ منذ الصغر .

أخي الأكبر حفظه الله .

منى عطية العيوطي

مقدمة

مسرح في معمل العلوم !!

لم يكن المسرح يوماً مجال دراستي، لكنه كان شغفاً منذ الطفولة، كانت عيني تلمع بالسعادة عند مشاهدتي إحدى المسرحيات على التلفاز، فكنت أذهب بعيداً وأتخيل نفسي وكأني واقفة على خشبة المسرح وأنال التصفيق والتقدير .

وكبرت قليلاً لأشارك في المدرسة في أداء المسرحيات بل وأحياناً في كتابتها، كنت أجد في ذلك المتعة والشغف، وزادت ثقتي بنفسي وشعرت بالقدرة على المواجهة بلا تلثم أو خوف، وأحببت الشعر وشاركت في مسابقاته، مما زاد حبي للغة العربية .

ومرت السنوات مسرعة الي أن ارتدت الجامعة واخترت تخصصاً علمياً للدراسة، ولكنه لم يصرفني عن حب المسرح وتابعت هوايتي، وبعد تخرجي عملت بالتدريس وأكملت تعلقي بفن المسرح فكنت أولف المسرحيات وأدرب عليها الطلاب ونشارك بها في المسابقات الرسمية، وما أدهشني أننا كنا نحصد المراكز الأولى فيها .

حتى اضطررت لتترك التدريس في تخصصي لظروف مرضية قاهرة، حينها فتح الله لي الطريق لأمارس هوايتي بشكل رسمي، ويشهد الله أنني بذلت جهدي لغرس القيم والخلق الجميل وعرض بعض المشكلات الاجتماعية من خلال المسرح .

لماذا هذا الكتاب؟

غادر المسرح مهرولاً قبل انتهاء عروض المسابقة وأخرج هاتفه متلهفًا يطلب ابنته.

حبيبتى... جهزى حقيبتك، سنتنقلين للعيش معي الليلة .

الابنة متعجبة / الليلة يا أبي!!

الأب/ نعم الليلة (بكل حنان وحنين)

كفانا ما مر من السنوات وأنت بعيدة عني، من الليلة سنكون معًا، لن نفترق حبيبتى يضمك قلب أبيك قبل أن تضمك جدران بيته .

الإبنة (بسعادة) حالاً سأجهز حقيبتى.. حالاً.

ليس هذا الحوار جزءاً من مسرحية كتبتها، ولكنه ما حدث بالفعل بين الأب وابنته، والذي انفصل عن الأم منذ سنوات طويلة وبينهما زهرة بريئة نبتة غضة ضعيفة، عصفت بها رياح الأيام، وقد حدث هذا بعد مشاهدة الأب -وهو يعمل في مجال المسرح - لمونودراما -صرخة خرساء والتي عبرت بصدق بالغ، دون قصد مني عن أزمته الشخصية .

وقد رأي الألم الذي يعتصر زهرة والتي رأى فيها ابنته، حينها أدركت الرسالة العظيمة التي يؤديها المسرح وتأثيره الكبير على المجتمع، إذا أعدت الأعمال المسرحية بصدق .

فن المونودراما

هو مسرحية متعددة الأدوار يؤديها ممثل واحد، وعادة ما يعاني البطل فيها من صراعات نفسية.

وقد ناقشت في كل عمل منها قضيةً معينة، قد تكون مشكلة اجتماعية أو نفسية صيغت كلها بصدق وحب أرجو أن تلقى قبولاً لدى القارئ ، وتبعتها بمواقف تربوية تُعلم الأبناء قيمة أو خلق أو تسلط الضوء على سلوكيات خاطئة فيسهل علاجها، وقد صيغت جميعها بشكل مسرحي لطيف .

وأخيراً

قدمت لكم بعضاً من الخواطر الشعرية، منها ما هو باللغة العربية ومنها ما هو بالعامية، سائلة الله تعالى أن تصل لقلوبكم.

منى عطية العيوطى

الباب الأول

مونودراما

لَسْتُ ظِلًّا

بابا أنا مش لاقية نفسى فى الحياة دى يا بابا
حياتنا ما فيهاش روح بيتنا برد اوى.
جدرانه باهتة ما فيهوش دفا المشاعر ولمة العيلة
احنا محرومين منكم انت وماما
وليه يتكتب علينا نعيش نفس الحياه دى يا بابا
بابا... عذراً. أنا لست ظلًا

(تدخل سما وهي تقفز من السعادة وتحمل شهادة تقدير ثم تصعد على الكرسي وتتخيل أنها محاطة بالصحفيين ووسائل الإعلام)

سما: شكراً ليكم . شكرا ليكم كلكم .

هدوء هدوء من فضلكم أحب أقدم لكم نفسي .

أنا بكل تواضع : سما عادل ياقوت، كاتبة المقال الأولى على مستوى الإدارة في الصحافة المدرسية (وتنزل من أعلى الكرسي).

أنسة سما " نعم أنا أسلوبى رائع في الكتابة .

شكراً ده من ذوق حضرتك .

ياه وكمان مشروع كاتبة واعدة شكراً لحضرتك .

نعم ؟ صورة معايا آه طبعاً افضل .

شكراً بشكركم جداً ميرسي ليكم كلكم (وفجأة تدخل ماما وهي متجهمة) .

ماما : إيه يا سما إنتي رجعتى؟ وإيه الدوشة الفضيعة اللي إنتي عاملها دى؟

سما : ماما حبيبتي أنا النهارده أسعد إنسانة حصل اللي كنت بستناه من شهور .

ماما : إيه يعنى طلعتي الأولى مثلاً؟

سما : فعلاً يا ماما الأولى على الإدارة في الصحافة المدرسية .

ماما : (باحتقار و غضب) صحافة مدرسية إيه التفاهة دى بحسب
حاجة عدلة اتفضلى غيرى لبسك علشان تشوفي
مذاكرتك... صحافة مدرسية (بتهكم) .

سما : الصحافة مش تفاهة يا ماما ده حلمي الي نفسي أحققه .

ماما : إوعي أسمعك تقولي الكلام الفارغ ده تاني الدكتور لو عرف
الكلام ده هتبقى مشكلة كبيرة .

سما : (بتعجب) الدكتور!! اسمه بابا يا ماما.. بابا .

إحنا في البيت مش في العيادة.. بابا بابا .

ماما : بابا الي بتقولها باستهتار يبقى رئيس قسم الجراحة في كلية
الطب و.... .

سما : (تقاطعها) عارفة يا ماما وصاحب أكبر عيادة في التخصص
بتاعه عارفة والله بس ده ميمنعش إنه بابا، نفسي أقوله بابا
زى كل الولاد .

ماما : آدى الي أخذناه من الصحافة بتاعتك، الجدل في كل شيء،
وعدم سماع الكلام أنا تعبت معاكى، خلاص الدكتور لما يرجع
يتفاهم معاكى .

(ويرجع بابا مجهدًا وملامحه مقتضبة) .

بابا : أه.. يوم مرهق كالمعتاد وباقى كمان العيادة، سما عاملة ايه ؟

سما : بابا حبيبي لك عندي مفاجأة (وتخرج شهادة التقدير من خلفها بفرحة غامرة) .

بابا : شهادة تقدير يبقى أكيد طلعتي الأولى .

سما : فعلاً يا بابا الأولى فى الصحافة .

بابا : (يقوم من مكانه وقد تملكه الغضب) الصحافة !!! إيه الكلام
الفارغ ده إنتي إزاي تضيعي وقتك فى حاجة تافهة بالشكل ده،
لا لا إنتي اتدلعتي زيادة عن اللازم، أنا هاجي المدرسة بنفسى
وأقدم شكوى لأنهم بيشغلوكى عن دراستك .

سما : بابا.. أرجوك كفاية، الصحافة مش شيء تافه، الصحافة
رسالة هي صاحبة الجلالة الصحافة حلمي يا بابا اللي
نفسى أحققه.

بابا : اخرصي إنتي عندك مهمة واحدة تتفوقى فى دراستك وتسيبي
أي حاجة ممكن تشغلك علشان تدخل كية الطب إنتي
فاهمة، عيادة يا قوت لازم تفضل مفتوحة دى وصية جدى
وبابا نفذ الوصية، وأنا كمان نفذتها وإنتي وأخوكى لازم
تبقوا دكاترة .

سما : ليه لازم نبقي دكاترة؟ يمكن جد حضرتك حب مهنة الطب وأبدع فيها و حضرتك كمان، لكن مش لازم نكون كلنا نفس النسخة، إزاي أجيال مختلفة في كل شيء يتحكم عليها تبقي نسخة مكررة، نفس الحلم نفس المهنة نفس الحياة، ده ربنا خلقنا مختلفين يا بابا، كل إنسان له شخصيته وقدراته وموهبته وحلمه وحياته اللي يتمني يعيشها ليه نضيق على نفسنا ونتخفق في شبر مع إن الحياة قدامنا ممتدة .

بابا : بنت.. إياكي أسمع الكلام الفارغ ده منك تاني، وهتبقوا دكاترة إنتي وأخوكي، وعيادة ياقوت هتفضل مفتوحة ليكم ولأولادكم وأولاد أولادكم من بعدكم .

سما : بابا ممكن حضرتك تسمعني، أنا مش لاقية نفسي في الحياة دى يا بابا، حياتنا باردة مفيهاش روح حضرتك من الجامعة للمستشفى للعيادة، إنت وماما، إنت بتوحشنا يا بابا، نفسي أخرج يوم من المدرسة ألاقيك مستنيني، نفسي أحط إيدى في إيدك ونخرج نلعب وتتنطط مع بعض من غير بدلة ولا عربية، نفسي ندخل سينما أو نحضر مسرحية، نفسي حياتنا تبقي فيها حياة يا بابا.

بابا : إيه التخريف بتاعتك دى ! وبعدين استني هنا أنا مش بخرجكم؟ مش أخذتكم معايا ل لندن الشهر اللي فات؟؟!

سما : فعلاً يا بابا أخذتنا معاك في المؤتمر العلمي اللي حضرتك حضرته، واتحفظنا في الفندق طول الوقت، بيتنا برد أوى يا بابا جدرانه باهتة فيه تكييف لكن ما فيهوش دفا، المشاعر ولمة العيلة وماما كمان من الجامعة للعيادة، أنا عارفة إن حضرتك وماما بتتعبوا علشان تعيشونا في المستوى ده، لكن صدقني يا بابا إحنا ممكن نتنازل عن حاجات كتير ومنحسش إننا محرومين، لكن إحنا محرومين من حنانكم وعطفكم إنتوا عايشين معانا لكن مش موجودين في حياتنا .

آسفة يا بابا لكن ممكن تسمحي حضرتك بآخر سؤال. إنت سعيد يا بابا؟؟؟

فين دكتور جمال الإنسان، مش أستاذ الجامعة والجراح المعروف؟؟!! لو حصلت المعجزة وقابلته إبقى سلم لي عليه وقوله إنه وحشني اوى وهفضل مستنياه .

بابا : إيه الكلام ده! غيركم بيتمنوا واحد في المية من اللي عندكم اتفضلي دلوقتي اتفضلي .

(يتحرك ويحضر الكمان ويجلس ليعزف)

سعيد؟ طبعاً سعيد بالتأكيد سعيد (ويعزف بحزن وحنين)،
وفجأة يتحرك ويصرخ لا لأمش سعيد، عايش آه.. ناجح آه.. مشهور
فعالاً.. لكن سعيد لا مش سعيد، كنت بحلم أكون عازف كمان ولما
قولت لبابا زمان ثار واتعصب وكسر لي الكمان، وساعتها انكسر حلمي
معاه وبقيت عايش من غير روح ولا حلم من يومها محستش
بالسعادة .

اتخرجت واجتهدت واشتغلت لكن جوايا كمان بيعزف ماردا
محبوس بيصرخ عايز يخرج ألحان تهز القلوب وتحرك المشاعر .

لأ.. مش هسمح لأولادي إنهم يضيعوا زي ما ضعت، تعالي يا
بنتي قوليلي إنتي بتحلمي بإيه؟ تعالي يا إبني اتكلم من غير خوف ولا
ضغط، ولادى مش ظل ليا، ولادى زهور مفتحة لها لونها وعبيرها،
ليه أحولهم لنباتات ظل، ليه يذبلوا في موسم ربيعهم، لا ولادى مش
ظل ولادى مش ظل .

سما : يا ااه يا بابا... أخيراً يا حبيبي لقيت نفسك واحنا كمان هنلاقي
نفسنا، هنكبر في ظلك هنكبر بحبك وتقديرك وفهمك لينا
واحترامك لإرادتنا، وهنتعب يا بابا ونجتهد علشان نشرفك
ونشرف عيلة ياقوت بس في المجال اللي نختاره ونحبه .

مش هنكون ظل لحضرتك لكن نتمني نكون امتداد لنجاحك
وتفانيك في عملك .

يمكن تعتقدوا إننا جيل تافه ومش متحمل للمسؤولية، لكن صدقوني الأحداث اللي مرينا بيها كبرتنا خمسين سنة، وفهمتنا الدنيا كويس، خلتنا منلتفتش كتير للمظاهر، مش لازم نكون دكاترة ومهندسين علشان نكون ناجحين في حياتنا .

أي مهنة نمارسها بحب وإتقان وعلم أيًا كانت المهنة دي هو ده عين النجاح طالما هنفيد بيها مجتمعنا .

لما أكون مدرس أو محامي أو صحفي أو فنان أنا مش فاشل، السعادة إني أمارس المهنة اللي بحبها وأقدر أفيد بيها الناس قوة البشر في اختلافهم .

كُنَّا بِنكْمَل بَعْض ... كُنْ أَنْتِ **نَفْسِكِ** وَلَا تَكُنْ غَيْرِكِ .

عُذْرًا فَأَنَا..... **لَسْتُ ظَلَاً**

أبقي فراشة ألف وأدور

أخذ من بستان الدنيا

أجمل عطر لأحلى زهور

عملي حياتي والحرية كنز لذاتي

مين علشان الظلمة يا بابا

يسيب النور

وانحرف عن القضبان

(ديودراما)

وانحرف القطار عن القضبان

صراخ وأشلاء في كل مكان

آمال بريئة وأدتها الأحزان

شمس ونور يقذفهما القطار عن القضبان

ما عاد أب يحمي ولا أم تعطي الحنان

أمست حياتهما بيتاً بلا جدران

أطفال يفتشون في أحجار القلوب عن الأمان

(جلبة وصراخ وبكاء في كل مكان وصوت عربات الإسعاف يدوي
ضجيج وأصوات متداخلة... الحقوا. الحقوا. الناس، القطر خرج عن
القضبان الحقوا. الحقوا القطر اتقلب، ووسط هذا الضجيج يخرج
طفل يصرخ ويجرى بشكل عشوائي في حالة هلع)

نور : شمس. شمس إنتي فين يا شمس؟ انتي فين يا حبيبتي..
شمس. شمس .

(من الداخل بصوت ضعيف هزيل)

شمس : نور نور أنا هنا يا نور.. تعالي يا نور.

تخرج شمس بملابس ممزقة وقد تشبست بمقعد كرسي
وهي مذهولة .

نور : الحمدلله إنك بخير يا حبيبتي (ويحتضنها) الحمدلله .

شمس : الحمدلله إنك لسه موجود يا نور أنا كنت مرعوبة إنك
تروح إنت كمان .

نور : شوفتي ماما يا شمس؟

شمس : لسه سايباني من دقائق بس دقائق، كلامها بيرن في وداني
فضلت حضناني، تحت قاعدة الكرسي دا .

(تنظر لقطعة الخشب وقد خنقها البكاء)

- إنتي هتخرجي من هنا يا شمس،
- أنا خايفة يا ماما الجثث حوالينا من كل ناحية،
- بقولك هتخرجي من هنا يا شمس هتعيشي،
- مش قادرة يا ماما أنا مخنوقة وخايفة، خايفة أوى يا ماما،
- شمس إنتي دلوقتي في سريرك ومتغطية وحاسة بالدفا، وأنا وبابا ونور جنبك إنتي فاهمة .
- حاضر يا ماما حاضر بس إحنا مش في بيتنا، آخر حاجة فكارها قبل ما أنام إننا ركبنا القطر علشان نزور تيتة في الصعيد، إيه اللي حصل يا ماما وفين بابا ونور؟ وليه الناس كلها بتصرخ حوالينا؟
- اسمعيني كويس يا شمس افهميني يا حبيبتى (بضعف شديد) يمكن تكون دى آخر مرة (وتخفي دموعها)، بابا دلوقتي في مكان جميل أوى عند ربنا، وأنا كمان هروح له، إنتي قوية، أنا معتمدة عليكي هتلاقي نور أخوكي وتعيشوا سوا، قولي له إني بحبه أوى، بحبكوا أوى.
- ماما. ماما.

(تمسك بقاعدة الكرسي وتحتضنها وتتهار باكية) .

نور : وأنا كمان بحبها أوى، كان نفسى أقولها قبل ما أودعها أو حتى بلاش أقولها، كان نفسى حتى أودعها .

بابا لما القطر اصطدم بيننا حضني.. حضني جامد أوى، حوط
عليّ بجسمه، بقيت جواه وقالي :

أختك يا نور لازم تلاقيها وفي البرد تدفيها

أوعي تتخلي عنها وف بحر الحياة احميها

دى شمس عود أخضر من حنانك اسقيها

دور على أختك يا نور لازم يا إبني تلاقيها

الاصطدام كان شديد أوى وبابا بياخد الألم عني ولافف جسمه
حواليا، يااه حضنه كان دافي أوى، قلبه كان بينبض بحنية نستني كل
الصرخات اللي حواليا، ربنا معانا يا بابا وإنت كمان معانا إنت وماما
بتحبونا وتحموننا، إنت بطلي يا نور كان نفسى يا إبني أوصل معاكم
لبر الأمان، لكن إيد الإهمال سبقت إيديا وخرجت أحلامي عن
قضبان الأمل لما خرج القطر عن القضبان، واتقلبت حياتكم
للمجهول لما اتقلب بينا القطر ، لكن أملي في ربي ما يشوبه شك
إنتوا وديعتي عنده هو الحافظ الأمين .

- أختك أمانة يا إبني حافظ عليها، علمها واحميها، وبالأخلاق

زينها وحليها، أختك أمانة، شمس أمانة.

- بابا. بابا. واتحدفنا أنا وهو بعيد عن القضبان .

وفي الضلمة اختفي مفارقش حضني إلا لما فارق دنيانا، فاتني
وفاتك، ضاع يا شمس معاه الدفا .

شمس : نور أنا جنبك تعالى نداوي برد الفراق، ن نور بايدنا
شموع اللقاء .

نور : إيدك في إيدى نزرع أملنا يرويه عرقنا .

شمس : إيدك في إيدى نمسح دموعنا نداوى جروحنا، ونحلّم
ببكرة، نعيش الأمل .

نور : حبيبتي يا أختي عيونك سفينتي، وأمي وأبويا وكل اللي ليا .

شمس : و إنت عصايتي، سندی ومرايتي وبهجة عينيا .

نور : حبيبتي يا أختي .

شمس : حبيبي يا أخويا .

(يظهروا بملابس مختلفة وقد أرهقهم السير و كسرهم الخذلان)

نور : تعبتي يا شمس .

شمس : وبعدين يا نور بقى لنا ليا لي نلف وندور .

نور : كان نفسي يا شمس في أهل تحمينا، تمسح دموعنا

حزن يضمننا في ضلمة حياتنا ينور شموعنا

شمس.. العمة تقولك :

في قلبي أضمك أشيلكوا في عيوني إنت وأختك، لكن يا حسرة العين
بصيرة والإيد قصيرة، المعايش صعبة يا ولاد الغالي، يا دوب على أد
الحال أنا وعيالي، وقال على رأي المثل اللي محتاجه البيت يحرم ع
الجامع يا ولاد أخويا .

نور.. والخالة تقول :

ابني وبنتي	يا ذكرى من أختي .
أشيلكوا في قلبي	يحوطكوا حبي
أتمناكوا جنبي	بيتي يساعكوا
لكن نور ما ينفع	يجاور بناتي
ده زينة الشباب	وأنا لازم أسمع كلمة حماتي ومنها أهاب
في حضني يا شمس	لكن دون أخوكي
ويا ستى بكرة	يلاقي له صحاب
خلاص يا أختي	مفيش اختيار

لازم نفارق علشان كلام مفرقش ما بين خطأ أو صواب .

شمس : تسيبني يا نور يا كل اللي ليا، في دنيا ما تعرفش معني العتاب.

نور : هسافر وراجع وخوفي عليك يزيدي المواجه، وخايف لا حلمي

يصبح سراب .

شمس : في قلبي يا أخويا حنانك وطيبتك هيبقوا معايا، وفي الغربية
لازم تلاقي لك صحاب .

نور : راجع لك يا شمس .

شمس : حبيبي يا نور .

نور : في قلبي يا شمس .

شمس : ارجع لي يا نور

(ويفترقان وهما يتمزقان)

(تظهر شمس وهي حزينة منكسرة ممسكة بمكنسة ومرتدية مريلة
مطبخ وعصبة رأس)

شمس :

حاضر يا خالتي هلم الغسيل..

وأساوى السيرير وأجهز لبناتك وليكي العصير

وأغسل لحماتك طقم السنان، وأسرحها بالمشط اللي من غير سنان

وهكنس وهغسل وأطبخ كمان،

وأولع بخور يااه تعبت يا خالتي.. واحشني يا نور، تعبت يا خالتي..

واحشني يا نور.

(وتجلس أرضا وقد هدها التعب وهي سارحة في أخيها نور،

وتلقي أمامها رسالة تقرأها، وفي الجهة الأخرى يظهر نور وهو

ممسك بصورة شمس ويتحدث إليها)

نور :

يا نور العيون
يا أخي وبنتي
يا حربي وسلامي
يا خطي وصوايي
يا ليلي اللي دافي بشلة صحايي
ولقمة هنية تملى البطون
خدتني سفيني لغربة وشجون
للقمة وقرش
ثمهم يا شمس كرامة تهون
تعبت في غربة ومتاهة بشر
قلوب من حجر بتعرف تخون
حنيني في قلبي أداريه وأصونه
تمري في خيالي دموعي تخونه
يا أجمل قدر
بعيدة ومعايا يا بردى ودفايا
يا ضحكي وبكيايا
وزادى اللي باقي في سكة سفر
سافرت وسيبتك
بعدت وما بعتك
تعبت في بعدك
مفيش حضن بعدك

يداوى السهر

يا بكرة وأمسي
راجع لك يا شمسي
وتراب مندي بحبة مطر
حقيقة وحدس
راجع لك يا شمسي
راجع لك يا شمسي
يا ليلي وضحايا
يا أرضي وسمايا

يا أجمل مدينة رأها بشر

(تحتضن صورته وتقبلها بحنين)

(ويقسم المسرح لقسمين أحدهما تظهر به شمس وهي تنظف وتطبخ ثم تجلس وتذاكر ،،، والقسم الآخر يظهر به نور وهو يغسل الأطباق بجهد ثم يخرج ويبيع ورد ويكسب المال، وبعدها يجلس ليذاكر)

شمس : يارب إنت عالم بيّ عارف إني مليش غيرك، ياما بحكي لك وكثير بشكي لك، عمري ما طلبت منك حاجة وخذلتني، يا اارب وفقني السنة دى أنا خلاص ثانوية عامة، طلي المرة دى كبير شوية كبير بالنسبة لي، لكن أكيد مش كبير بالنسبة لك يا كريم يا عظيم يا الله، نفسي أدخل كلية الطب مش علشاني يارب بس دى، كانت أمنية ماما ونفسي أحققها لها، نفسي أقدر أساعد الناس أخفف آلامهم نفسى أقف جنب الفقراء، وأحاول أرسوم على وشوشهم المريضة بسمه الشفاء، يارب أعاهدك إني هعمل اللي علي والنتيجة بقي بتاعتك إنت، وأنا عندى ثقة في كرمك وعطفك .

الخالة : إيه يا شمس عاملة إيه، يادى الكتاب اللي مبتسيبهبوش من إيدك، يا بنتي ارتاحي شوية أنا خايفة عليكي .

شمس : متقلقيش علي يا خالتي كتر خيرك وعمومًا أنا خلصت كل الشغل اللي حضرتك طلبتيه مني .

الخالة : (بابتسامة صفراء) أنا مش بتكلم علشان شغل البيت يا بنتي إنتي بس صعبانة علي أنا عارفة إنك مش بتقصرى فيه وبعدين ثانوى عام إيه اللي ورطتي نفسك فيه كنتي دخلتي دبلون زى بنات خالتك، ولا حتي كانت كفاية الإعدادية .

شمس : معلى يا خالى دى كانت رغبة بابا وماما إني أكمل تعليمي
أنا ونور .

الخالة : إفتكروا لنفسهم الرحمة حد يصدق إنه عدى
عليهم ٨ سنين

يا أختي اكنها امبارح وبعدين يا شمس مكنتيش قبلتي العريس اللي
حماتي جايباه لك .

شمس : ده مش مكمل تعليمه .

الخالة : وماله الراجل ميعيبهوش إلا جيبه وهو كسيب وابن حلال

شمس : هو فعلاً ابن حلال بس أنا مش بفكر في الموضوع ده
دلوقتي يا خالتي، نفسي أكمل تعليمي .

الخالة : بدل المصاريف ووجع القلب يا بنتي .

شمس : نور بيبعتلي مصاريفي يا خالتي ربنا يخليه لي وكمان
بيكمل تعليمه .

الخالة : يعني هتطلي إيه بعد الغلب وتمقيقة العين دى
آخرك دبلون .

شمس : دكتورة ان شاء الله .

الخالة : هههه (تضحك بسخرية)، قال دكتورة قال، ده لما تشوفي
حلمة ودنك .

شمس : إن شاء الله دكتورة يا خالتي (وتجتهد في مذاكرتها).

(تظهر على المسرح وهي تتحرك بعصبية وقلق ذهابًا وإيابًا)

يارب.. يا رب. نفسي أفرح يا رب. يا كريم

الخالة : وبعدين يا بنتي **خيلتيني** كل ده علشان النتيجة النهاردة؟
شمس : حلم عمرى يا خالتي، إدعيلي الموقع ثقيل أوى افتح بقي.
(وفجأة تنظر باندهاش وتصرخ)

الخالة : إيه يا بنتي إنني سقطتي، طب **معلش** مش قولتلك ثانوى
عام إيه وغُلب إيه .

شمس : ٩٨ في المائة يا خالتي. ٩٨ يا بابا. ٩٨ يا ماما.

أنا وفيت بوعدي، هبقي دكتورة زى ما كنتوا بتتمنوا تشوفوني، ونور
كمان هيتخرج السنة دى في إدارة الأعمال .

راضي عني يا بابا، فرحانة بينا يا ماما، إنتو أكيد حاسين بينا دلوقتي،
ربنا علشان بيحبكم حافظ علينا ووقفنا يارب مهما حمدتك
مش كفاية .

أنا حلمي زى القدر	لازم في يوم يترد
وعهدى يا والدي اتسطر	وحلفت أصون الوعد
بالصبر عشت في جلد	ولا عزمي في يوم اتهد
فتح لي طاقة أمل	والحلم ما له حد
ارتاحي يا أمى النهاردة	أنا وفيت بالوعد
ويانور هتيجى تلاقيني	فارشة في طريقنا الورد

كلنا إنسان

علموا أولادكم أن المختلف عنهم

مش دائماً وحش مش منبوذ

اقبلوا المختلف

لو كان في شكل أو لون أو دين

بلاش نكسر بعض

إحنا في الآخر، كلنا واحد

والله يا بنت يا فرح وهترجي المدرسة وإيه إعدادى بقي وهيبقي
لك صحاب جداد تجرى بقي وتلعي معاهم .

أجرى أجرى إزاي. آه أجرى أنا إسترونج، لكن في الحقيقة من
يوم ما حصلت لي الحادثة وبترولى رجلي وركبت الطرف الصناعي
ده ما بروحش المدرسة ولا بعرف أجرى، لكن بعرف أنط وكثير
وقعت وأنا بحاول أتحرك بيها .

لكن كنت بقوم أقوى من الأول .

ماما دايمًا تقولي:

يا فروحة إنتي أجمل بنوتة، ربنا رجعت ليا تاني بعد ما كنتي هتروحي
مني، والفرحة رجعت بيتنا من تاني يا حبيبتي .

وأديني أهو رجعت وقفت على رجلي تاني ورجعت المدرسة .

الله البنات حلوين أوي هروح بقي أتعرف عليهم (مبتسمة وتتحرك
نحوهن ثم تتبدل ملامحها دهشة)، إيه ده في إيه ليه البنات
بتبعد كده!!!

يبعدوا عني ليه للدرجة دى خايفين مني؟

هو أنا فعلاً شكلي بيخوف؟

البدينة: لا بالعكس إنتي جميلة أوي إوعي تقولي كده تاني .

فرح: شكراً ليكي بس إنتي ليه قاعدة آخر الفصل لوحده؟

البدينة: أبدأ مفيش ولا بنت وافقت تقعد معايا في الديسك وقالوا لي إنتي عايزة ديسك لوحديك، لكن مش مشكلة أنا مش زعلانة اتعودت على كده خلاص أنا استرونج، المهم إنتي ما تزعليش ويا ريت نبقي صحاب .

فرح: لا مش مشكلة بكرة لما يعرفوني كويس، يعرفوا فرح من جوا يمكن ينسوا الرجل الصناعية دي، ويمكن يحبوني، أكيد هيحبوني.

المهم إنتي قولتي إيه؟ استرونج .

أنا كمان استرونج وهتبسط جدًا لو بقينا صحاب .

لكن هم ليه عملوا كده معاكي علشان مليانة شوية يعني ؟ وإيه مشكلتهم في كده إنتي طيبة جدًا وروحك حلوة .

البدينة: لا يا فرح ولا يهملك أنا إتعودت على كده خلاص وأكيد هيبجي وقت ويعرفوا أد إيه هم غلطانين .

عارفة أول السنة المستر سأل سؤال، رفعت إيدي علشان أجاب وللأسف كانت إجابتي غلط شيء عادي يعني بيحصل كتير لكن اللي مش عادي رده عليا .

المعلم: إيه ده إنتي مخك تخين زي جسمك فكرى قبل ما ترفعي إيدك .

البدينة: وبقيت فعلاً بفكر ١٠٠ مرة قبل ما أرفع إيدي وغالباً مكنتش برفعها .

ولا لما يبجي باص المدرسة بقي كل البنات تركب وأفضل
مستنية آخر بنت علشان ما أسمعش الكلمة المعروفة (ما تستني
لما نركب إنتي عايزة باص لوحذك) .

فرح: ولا يهملك يا حبيبتي أنا كمان سمعت كلام مش ظريف في
الباص (إستني بقي برجلك دى لما نركب إحنا الأول)

لكن ولا يهمني يا بنتي أنا استرونج .

البدينة: وياريتها جت على المدرسة والباص ده حتى وأنا ماشية في
الشارع بسمعتها كثير وبشوفها في العيون أكثر يا تخينة، بقي
نفسى أختني عن عيونهم علشان ما أشوفش النظرة دى، ولا
يوم ما بشترى لبسي بيبقي يوم، بتحمل فيه كلام
ونظرات بتقتلني.

فرح: خلاص ولا يهملك بقي إحنا اتفقنا خلاص إحنا إيه؟ استرونج .
إيه ده استنى استنى كده مين البنات اللي لابسة نظارة وقاعدة هناك
لوحدها زينا دى، مالك يا بنتي قاعدة ليه لوحذك ومش بتلعب مع
البنات؟ في إيه؟

أبدأ أنا عندى مشكلة في عيني بيقولوا لى عينيكي مخاصمة بعضها
ويضحكوا عليا، مع إني لابسة نظارة وبتعالج .

فرح: ياه للدرجة دى لمجرد إن عندك مشكلة في عينيكي. ! عمومًا
ولا يهملك هتبقي استرونج زينا أنا ورحمة، هنجرى مع بعض
ونلعب ونتنطط، هم اللي خسرايين على فكرة مش احنا .

وإحنا إيه؟ استرونج .

وخلص أول يوم مدرسة لي وعرفت بعده إني هفضل أنا وصحابي
الجداد استرونج .

لكن لوحدنا، ومش عارفة هفضل كده لحد امتا.

وكتير بسأل نفسي أنا ليه كده؟

بس ده مش ذنبي أنا كنت زيكم لحد ما حصلت لي حادثة العربية
وربنا لطف بي وبعد عمليات جراحية مش فاكرة عددها رجعت
للدنيا بس فقدت رجلي.

ومريت بأوقات صعبة ومعاناة لحد ما بدأت أتكيف مع وضعي
الجديد وأنا صابرة وراضية، مش ذنبي إني مختلفة عنكم.

ليه عينيكم ما بتشوفش إلا الشكل!

ليه مش بتدوا نفسكم فرصة تشوفوني؟

تشوفوني أنا فرح، تبصوا عليا من جوا وتنسوا رجلي الصناعية دي؟
مش يمكن أكون زيكم إنسانة عندي مشاعر وقلب. ؟ بس أكيد مش
زى قلبكم ولا زى عينيكم اللي ما بتشوفش فيا إلا الطرف
الصناعي ده.

مش معنى إني مختلفة عنكم يبقي وجودي بينكم مش مقبول أو
أكون منبوذة منكم .

وصاحبتى الي وزنها زايد ذنبها إيه؟

مش كفاية إنها بتعاني تزودوا معاناتها ليه؟ تجرحوها ليه؟

ولا التانية الي عندها مشكلة في عينيها، تبعدوا عنها ليه؟

مشكلتها هتأذيكم في إيه؟ بالمناسبة بقي هيا بتشوف أحسن منكم
ما بتشوفش كويس بعينها لكن بتشوف كويس جدًا بقلبها،
وغيرنا كتير وكثير .

ليه بتخلوا عينيكم هي بس الحكم حتى دي ما بتشوفش كويس .

شيلوا الغشاوة الي عليها وبصوا علينا بعيون رحيمة، عيون تشوف
الجمال الي جوانا قبل ما تشوف العجز الي في جسمنا قلوب
تشوف التشابه الي بيننا قبل ما تشوف الاختلاف، كفاية ظلم بقي.

علموا ولادكم إن المختلف عنكم مش دايماً وحش مش منبوذ.

اقبلوا المختلف لو كان في شكل أو لون أو دين .

إنتو كسرتوا امبارح، بلاش تعملوا شرخ في بكرة، بلاش تعملوا شرخ
في بكرة .

إحنا في الآخر كلنا واحد...

كلنا إنسان

وردة في الزحام

جاية لكم من جوا جوا مصر

من العروسة إسكندرية

من قلب قلب إسكندرية

أجدع ناس من بحرى يعنى الشهامة والجدعنة

ولاد البلد والزحمة أيوة الزحمة

زحمة في كل حاجة زحمة في كل مكان

لوتسمحوا ليّ أنا وإخواتي أربعة

عاشين في شقة محنقة ومربعة

بابا من الفجرية صاحي ما هو أصله عامل مطبعة

شقيان لكن شهم وجدع في الحنة سيرته مسمعة

وماما شايفة الويل معانا حنان وطيبة ومجدعة

كمان معانا جدو وتينة عيلة صحيح متجمعة

تينة طويلة حبتين بتنام على سريري وهي مربعة

أما جدو يا دوب في طولي نايم بقي ببرطعة

بيتنا صحيح أوضة وصالة لكن الضحكة مللعة

قديم لكن ونس حيطانه مليانة شقوق متصدعة

وتد ما تهزه ريح الكره ولا قسوة في قلوب متشعبة

ده أعلى عندي من قصور فيها الوشوش متصنعة

معلش آسفة لو كلامي طال شوية

لكن تعالوا معايا حتي لو شوية

في دنيتي الزحمة لكن بتصب حنية

طول عمرى عايشة في زحمة، في البيت زحمة، في المدرسة زحمة، في الشارع زحمة، في فرن العيش زحمة، حتى المكان الوحيد اللي المفروض أكون فيه لوحدى حتى ده كمان كان زحمة، حتى قبل ما أتولد متستغربوش وأنا في بطن أمي أخويا توأمي اللي ما رضيش يخليني براحتي حتى في رحم أمي أهو ده كمان شاركني فيه وإيه كان واخذ وضعه كويس (تشير بيديها أنه ممتلئ) .

آه ما يغرکوش شكلي هو في حجمي مرتين تلاته أربعة .

فل : إيه يا ستي ما توسعي شوية إنتي واخدة المكان كله مش لوحدك إنتي هنا .

وردة : عارفة والله إني مش لوحدي حاضر حاضر، وفضلت أوسع وأنزاح لحد ما إنزحت زى ما إنتوا شايفين، وأختي الكبيرة بقي اسمها ياسمين .

(تسير بدلال ممسكة مرآة وتضبط شعرها)

ياسمين : وردة.. يا وردة فين كريم الشعر بتاعي؟

وردة : شيلتهولك في الدولاب علشان جدو ما يخلصهوش .

جدو : إيه إيه جدو مصرفهوش! إيه اللي بتقوليه ده يا بنت يا ياسمين ده انا صارفه بالمليم .

ياسمين : هو ايه ده يا جدو؟

جدو : المعاش يا روح جدك، أوعوا تفكروا إني كبرت وما بسمعش .

وردة : عارفة يا جدو ده إنت حتى بتسمع دبة النملة .

جدو : إيه عاملة! مين بقي اللي عامل عاملة المرة دى؟ أكيد الواد فل حاكم أنا عارفه وعارف عمايله السودا .

وردة : لا يا جدو مش فل أنا اللي عملتها معلش يا جدو .
(وتضرب يديها بابتسامه)

إنتي صحيتي يا تيتة أهلاً أهي كملت .

تيتة : يا بنت يا وردة.. وردة فين طرحة الصلاة بتاعتي؟

وردة : والله تحت المخدة أنا حطاها بإيدي .

تيتة : هيه هيه يا بنتي ما أنا دورت عليها ملقيتش غير رجل جدك .

وردة : أيوة جنب رجل جدو .

تيتة : خلاص يا حبيبي لقيتها الظاهر كان جدك لافف بيها رجله
من السقعة، طيب الطرحة ولقيناها فين بقي النظارة؟

وردة : ما إنتي لابساها يا تيتة يا حبيبي أهه .

تيتة : الله.. أيوة صحيح ربنا ينور لك عنيني يا حبيبي أقعد بقي أقرأ
في المصحف شوية .

وردة : نعم يا ماما إيه؟ ريحان صحي حاضر يا ماما هدخل أجيبه

(تهدهده) نعم يا ماما أجيب العيش حاضر يا ماما هجيب

العيش، نعم يا جدو إيه! كيس جل علشان شعرك حاضر يا

جدو، نعم يا فل! رباط للكوتشي حاضر يا خويا (بضجر)،

أيوة يا تيتة نعم! قلم روج، حاضر. إيه! ومش هقول لجدو

حاضر. حاضر يا ماما، حاضر جدو. حاضر يا فل حاضر يا

تيتة.. حاضر. حاضر حاضر. أنا تعبت .

وردة : إيه ده هوص إنتو بقي ده صوت حبيبي إنت رجعت يا بابا؟

حمدالله على السلامة يا حبيبي وحشتنا

بابا : الله يسلمك يا حبيبتي يا وردة دنيتي، أهلاً يا والدي.. وحشتيني
يا أمي.. إيه يا أم ريحان عاملة إيه؟ ربنا ما يحرمنى منكم ولا
من لمتكم الحلوة حواليا .

وردة : ألا صحيح يا بابا إنت ليه سممتنا كلنا بأسامي الزهور؟

بابا : أبدأ يا وردة علشان تعطروا الدنيا حواليا بعد طول الشقا .

جدو : إيه إيه! ملكش دعوة بقي ليه كدا بس يا ابني؟

(يضحك الجميع)

تعالوا بقي نقفل باب العيلة شوية دوشة

وزحمة فيها حنية أطلع براها ألقاني

في المدرسة مزنوقة في تختة ورا باب الفصل إنما إيه

ومدرس مطحون من الدوشة بس الحب مالي عينيه

اسكت يا إبني فاهمة يا بنتي والطباشير علم في إيديه

ولما الواحد منا بيغلط في سؤال يتلفت حواليه

الخرزانة جاهزة بسرعة من الأستاذ هترف عليه

في الفسحة تلمنا غديوة كله بيدفع ربع جنيه

في السوق البياح يوزن لك والبركة كانت مالية إيديه

شوارعنا زحمة لكن رحمة وناس بتساعد من غير ليه

والجار يسند جاره وقلبه بيدى قبل إيديه

دى كانت وردة زمن **الحب** كبرت دبلت

آه يا خسارة كبرت ليه آه يا خسارة دبلت ليه

وردة : ده كان بيتنا ودى كانت حياتنا تعالوا بقي شوفوا بقينا إزاي
فل : كده يا ياسمين أنا هوريكي بقي أكتبلك كومنت عالبوط
بتاعك وإنتي متعبرنيش أنا هوريكي .

ولا ماما كمان دى اتحولت .

ماما : أما ألحق بقي أبعت كومنت لجدو أهنيه بعيد ميلاده .

الفيس ده حاجة عظيمة جدًا هو اللي بيفكرنا بأعياد ميلاد أهلنا
وحبايبنا أما افتح بقي الصفحة بتاعتي، يارب زود الكومنتات عليها،
يا رب كتر اللايكات فيها، ده اللي بطلبه منك يا رب .

وردة : وحشتيني يا ماما .

ماما : أهلا يا حبيبتي عاملة إيه .

وردة : وحشتيني يا ماما وحشني حضنك، نفسي أنكلم معاكي .

ماما : ادخلي ابوكس قوليلي كل اللي نفسك فيه أو ابعثيلي ريكورد
على الواتس أسرع من الكتابة .

وردة : بقولك يا ماما وحشتيني، إخواتي كمان وحشوني، وحشتني
لمتنا قدام مسلسل أو فيلم .

ماما : خلاص أوكي أوعدك العيد الجاي لما نجيب الخروف نتجمع
ع الغداء ودا برومز .

وردة : برومز يا ماما طيب.

وبابا هو كمان شوفوا بقي إزاي

بابا : لا لا لا يا أم ريحان مكنش العشم بعد عشرة السنين أكتبلك
كومت ع البوست بتاعك وتكتفي بايموشن لا لا لا .

وردة : وحشتني يا بابا .

بابا : أهلا أهلا يا حبيبتي عاملة إيه؟

وردة : عاملة إيه ! أنا مشوفتكش من أسبوع يا بابا .

بابا : لا لا متبالغيش، أنا شايفك من خمس أيام لما اتقابلنا في
الأسانسير، معلى من بعد ما بقيت صاحب المطبعة ومديرها
انشغلت شوية .

بابا : إنت مشوفتش جدو من إمتا؟

بابا : مش فاكر الحقيقة ليه في حاجة؟ هو تعبان؟

وردة : ادخل شوفه يا بابا من ساعة تيتة الله يرحمها وهو في حالة
غريبة.

بابا : أكيد كويس أنا مقعده في أحسن أوضة في البيت الجديد ده
وعموما خلاص هعدى عليه بالليل .

وردة : (بصوت خافت حزين) ده لو استني لحد بالليل .

(يدخل الجد وقد حناه الزمن وهذه الحزن ونهشته الوحدة ويحمل حقيبة)

وردة : إيه يا جدو رايح فين؟ وإيه الشنطة اللي في إيدك دي؟

جدو : راجع بيتي يا بنتي .

وردة : بيتك ! بيتنا القديم ده آيل للسقوط يا جدو .

جدو : بيتكم إنتو اللي آيل للسقوط ربنا يجمع شملكم يا بنتي
من تاني .

أنا سقعان يا بنتي، هرجع بيتي يمكن ألاقي فيه الدفا، ذكرياتنا
لما كنا عيلة أحلي سنين عمرى مع جدتك، لمتنا وضحكتنا اللي
كانت بترج البيت، لقمطنا اللي كنا بنقسمها مع بعض وإحنا راضيين.
السرير اللي كان ضيق علينا أنا وإنتوا وجدتك الله يرحمها بس
كنا دفيانين، أنا هرجع بيتي يا وردة هرجع بيتي .

وردة : لا يا جدو ما تسينناش .

جدو : سيبيني يا بنتي، سيبيني أقضي اليومين اللي باقيينلي على
الذكريات الحلوة، سيبيني أعيش وسط عيلة حتي لو
في خيالي .

وردة : أنا محتاجة لك يا جدو متسيننيش خدني معاك، خليني في
حضنك هو ده المكان الوحيد اللي بحس فيه بالدفا،
جدو... جدووو .

خدني يا جدو معاك رجعي لزمنا فات

كان الحب مالي قلوبنا والسما بتمطر ضحكات

خنقوا الكلمة آه يا خسارة وحطوا مكانها يا جدو سكات

نفسى أتعلق في دراع بابا وأرجع طفلة بفيونكات

تاهت عيلتي وسط الزحمة فيس وماسنجر وماسدجات

بقت الضحكة يا دوب سمايل وكلامنا بقي كومنتات

خدني يا جدو معاك وإدعي لنا يمكن تنفعنا الصلوات

صرخة فرساء

إيه ذنبي لما أفتح عيني على الدنيا
ملقيش بابا ولا ماما !!!
ماما نفسي أترمي في حضنك
وأحكي لك عن كل اللي بيحصل
بابا نفسي أرجع البيت وأنا حاسة بالأمان
لأني ساندة ظهري عليك
إنتوا موجودين ومش موجودين
وحشتوني أوى

(تدخل الجدة وقد حناها الزمن لتوقظ حفيدتها زهرة)

الجدّة : يلا يا زهرة حياتي يا زهرة قلبي، قومي يلا يا ست البنات .

زهرة : حاضر يا تيتة يا حبيبتي هقوم طبعًا ده النهاردة الخميس
اليوم اللي بستناه كل أسبوع علشان أشوف ماما .

تيتة : كده برده يا زهرة وإنتي مش مبسوفة معايا يعني؟

زهرة : ده كلام برده يا أجمل تيتة في الدنيا والله من غيرك مش عارفة
كنت هعمل إيه، إنتي اللي أخذتيني في حضنك وأنا طفلة
صغيرة بعد ما بابا وماما انفصلوا .

تيتة : كل واحد بياخد نصيبه يا حبيبتي .

زهرة : أيوة طبعًا يا تيتة ربنا ما يحرمني منك .

بس ما يمنعش إني نفسي في يوم ألبس شراب فردتينه شبه بعض،
أو أكل الرز مفلفل، بس ولا يهملك إنتي برده أحلي تيتة .

(يرن تليفونها)

زهرة : أهلا يا ماما وحشتيني يا حبيبتي مال صوتك؟ إوعي تقولي
إنك مش جاية نعم! ! أخويا الصغير سخن جدًا ومش هينفع تسببيه
لوحده خلاص يا حبيبتي أشوفك الخميس الجاي .

(وتضع الهاتف بخيبة أمل)

ليه كده يا ماما كنت محتاجة أشوفك أوى عندي كلام كتير كان
نفسى أقولهلوك :

نفسى يا ماما أقول بحبك وتسمعيني

ألعب وياكي واتنطط وتحضني

ولما اغلط بالحب يا ماما تعاقبي

أحكي لك عن يومي وإنتي تفهميني

ولما أتعب إيديكي بلسم يداويني

نفسى أدخل جواكي محتاجة لحضنك يحميني

وأفضل مستنية ليوم الخميس لحد ما أشوف ماما، وحشتيني
أوى يا ماما .

ماما : إنتي أكثر يا زهرة يا حبيبتى أنا آسفة على الأسبوع اللي فات
غصب عنى أخوكي لسه بيبي وكان سخن جدًا وأنا مهلوكة
طول الأسبوع بين شغلي والمذاكرة لإخواتك وشغل البيت .

زهرة : بس إنتي بتوحشيني أوى يا ماما وكثير ببقى
محتاجة لحضنك.

ماما : معلش يا حبيبتى إنتي عارفة إخواتك صغيرين وبعدين أنا
مطمنة عليكى مع تيتة هي بتحبك أوى وعمومًا أنا عاملا لك
مفاجأة.

زهرة : خير يا ماما؟

ماما : شوفي بقى يا حبيبتي إحنا هنتغدى برا وبعدين ندخل سينما.

زهرة : لا بقى سينما إيه أنا مش عايزة حاجة تشغلنى، عنك عايزة أفضل جنبك أشبع من تفاصيلك لحد ما أشوفك الأسبوع الجاي، مش بقولك بتوحشيني أوى يا ماما .

ماما : خلاص يا حبيبتي اتفقنا .

زهرة : ماما في سؤال محيرني إنتي حقيقي بتحبيني؟ طب لو بتحبيني ليه سيبتيني؟

ليه مش عايشة معاكي؟

ماما : زهرة حبيبتي إنتي دلوقتي كبرتي وهتقدرى تفهميني، العلاقة بيني وبين باباكي كانت خلاص وصلت لطريق مسدود مكنش ينفع غير الانفصال .

زهرة : وأنا يا ماما مفكرتوش فيا وإيه هيكون مصيري!!

ماما : أنا عارفة إنك ملكيش ذنب في الوضع اللي وصلنا له ده بس الحياة مش بتقف يا حبيبتي أنا إتجوزت وباباكي كمان إتجوز وكل واحد منا بقى له أولاد تانيين لكن عمرنا ما نسيناكي يا زهرة سامحينا يا حبيبتي ، يمكن مكونش الأم اللي اتمنتها لكن إنتي البنت اللي اتمنتها وانا فعلاً فخورة بيكي .

زهرة : ماما أنا فعلاً محتاجاكي جداً الفترة دي، في حاجة نفسي
أطلبها منك.. ممكن.. ممكن لو سمحتي أعيش معاكي، حتي
لو لفترة؟ نفسي أصحى من نومي ألاقىكي جنبي، أرجع آخر
اليوم أحكيك كل اللي حصل معايا، محتاجاكي يا ماما،
محتاجة ماما .

ماما : خلاص يا حبيبي جهزي شنطتك .

زهرة : بجد يا ماما ثواني ثواني بس وأجيب الشنطة، يااه أخيرا
هبقي معاكي .

ماما : (تمسك الهاتف) أيوة يا حبيبي بقولك إيه معلش زهرة أعصابها
تعبانة شوية ممكن تيجي تقعد معنا كام يوم؟

إيه؟ تقعد فين؟ في أي مكان مش مشكلة نعم؟ الولاد عندهم
امتحانات والوقت مش مناسب .

طيب خلاص مش مشكلة تمام يا حبيبي أنا هتصرف .

(وتغلق هاتفها وهي تقول بصوت خافت) مش عارفة هقولها إزاي.

زهرة : أنا جهزت الشنطة يا ماما شوفتي بقي بسرعة إزاي .

(وتتعلق بذراعها)

ماما : (تغلت ذراعها من زهرة بخجل) معلش يا حبيبي هناجل

الموضوع ده شوية، إخوانك عندهم امتحانات وإنتي عارفة

هم لسه صغيرين محتاجين لي أذاكر معاهم، كان نفسي

أخذك بس إنتي عارفة غصب عني، أنا مطحونة طول النهار

بين شغلي وشغل البيت ومذاكرة الولاد .

زهرة : خلاص يا ماما مش مشكلة، أنا حتي مبسوفة هنا مع تيتة،
اتفضلي حضرتك علشان متتأخريش على عمو وإخواني .

وتمشي ماما وتسيبني وأنا حاسة إن كل جزء فيا بيصرخ ويشدني
ليها، مع إني مش رقم واحد بالنسبة لها بس هي كل حاجة بالنسبالي،
وأنا محتاجالها وللأسف مليش مكان في بيتها خلاص، بقولها بحسرة
وقهرة لكن هي دي الحقيقة .

وييجي بابا ... أهلا يا بابا وحشتني

بابا : هه يا زهرة عاملة إيه؟ والهانم مامتك ازيها؟ أوعي تكوني أخذتي
منها فلوس؟

زهرة : أرجوك يا بابا كفاية كل مرة تسألني نفس السؤال وأجواب
على حضرتك نفس الإجابة، أنا مش محتاجة فلوس من ماما
أنا محتاجة ماما فاهمني يا بابا .

بابا : خلاص تمام، بحب بس أطمئن، وطبعًا أنا مش مخليكي
ناقصك حاجة .

زهرة : صحيح يا بابا بتحيب لي أحسن لبس وبروح أفضل مدرسة
لكن ناقصني حاجات كتير أهم من ده .

بابا : محتاجة فلوس؟ أزود لك مصروفك؟

زهرة : أنا مش محتاجة فلوس يا بابا محتاجك إنت.. إنت وماما،
محتاجة أنام بالليل وأنا متطمنة إنك جنبي، نفسي أقول
لصحابي دلوقتي بابا جاي ياخدني، محتاجة أعيش معاك لو
مش نافع أعيش مع ماما .

عارف يا بابا أنا أوقات كثير بقول لنفسي إن اليتيم مرتاح، مرتاح
عني عالقل هو معندوش أب ولا أم، وعارف إن ده قضاء ربنا، وقادر
يتعايش مع الوضع المؤلم ده، وعارف إنهم في مكان أحسن بكثير
من الدنيا دي، لكن أنا.. أنا محرومة من حضنكم وابتوا عايشين
يرضى مين يا بابا ده يرضى مين؟

بابا: خلاص يا زهرة.. خلاص يا حبيبتي حضري شنطتك هاخذك
تعيشي معايا في البيت .

زهرة: (تقفز فرحاً) بجد يا بابا هتاخذني معاك بجد هعيش في
حضنك خلاص .

ثواني يا حبيبي وأجيب الشنطة .

بابا: (يمسك هاتفه) أيوة يا حبيبتي.. بقولك زهرة أعصابها تعبانة
شوية، وأنا قولت يعني تيجي تعيش معنا حتى لو فترة نعم؟ تقعد
فين؟ في أي مكان مش مشكلة إيه؟ الولاد عندهم بطولة ومش
سايبين لك دقيقة فاضية ومعندكيش طاقة تتحملي مسئولية زيادة،
طيب طيب خلاص ربنا يعينك أنا هتصرف .

زهرة: أهي الشنطة يا بابا مش قولتلك ثانية واحدة .

بابا: معلش يا زهرة هناجل الموضوع ده شوية علشان طنط
مشغولة جدًا اليومين دول إخوانك عندهم بطولة في السباحة، أنا
كان نفسي آخذك معايا بس معلش أنا في شغلي طول النهار و... .

زهرة : (تقاطعها بخيبة أمل وصوت يخنقه البكاء) خلاص يا بابا مش لازم تبرر ولا يهكم ما إنت عارف إني مبسوفة هنا مع تيتة، اتفضل حضرتك علشان ما تتأخرش علي طنط وإخواتي .

نفسى أصرخ بأعلى صوت لكن الصرخة مخنوقة جوايا صرخة خرساء، إيه ذنبي بسأل نفسي السؤال ده مية مرة إيه اللي عملته وأنا طفلة عمرها سنة علشان بابا وماما يسيبوا بعض ويسيبوني؟ تعبت من السؤال اللي مش لاقية له إجابة .

وأكيد في أطفال زي كثير بيسألوا نفسهم نفس السؤال، ممكن نكون عايشين كويس من وجهة نظركم لكن في الحقيقة إحنا ضايعين، تايهين، سقعاين حتى لو غطيتونا ببطاطين الدنيا كلها مش دفيانين، محتاجين حضن بابا وماما، سقعاين حنان ولمة عيلة

أنا ما ليش مكان لا عند ماما ولا عند بابا، طيب أنا هنا ليه؟

أنا هرجع المكان الوحيد اللي كنت فيه جنب ماما. المكان اللي محدش هيقدر يبعدني فيه عنها (وتصرخ بأعلى صوتها) هرجعلك يا ماما. ماما (وتتجه للجهة الأخرى من المسرح) بابا أنا محتاجالك يا بابا. ماما .

(وتجرى وتقع أرضاً وتتكور كالجنين في رحم الأم)

طاقۃ امل

دى قدرات بنتنا واحنا لازم نعرف بده
ملك مش مقصرة وهتفضل بنتنا وحييتنا
والملاك اللى منور بيتنا
بلاش نكسرهما ونكون إحنا كمان ضدها
دى نعمة ربنا علينا والخير كله دخل بيتنا بعد ولادتها
خلينا نكون لها (طاقة أمل)

يااه أخيراً رجعت البيت وخلصت من كابوس المدرسة ده، يا سلام لو كان العالم من غير مدارس ولا امتحانات ولا درجات، ملك مستواكي وحش جداً، ملك لازم تركزي شوية، ملك استدعاء ولي أمرك لازم ييجي يسحب ملفك .

تعبت... تعبت

ملك مش جهاز كمبيوتر تحملوا عليه كل المواد والمعلومات ووقت ما تحبوا تضغطوا على زر التشغيل تطلعلكم كل المعلومات، أنا مش جهاز كمبيوتر، أنا إنسانة، ممكن أنسى.. ممكن أغلط، بس خلاص المهم إن اليوم خلص، ألحق بقي أدخل أوضتي وأشخبط بألواني حبايبي محدش منهم بيقولي مستواكي وحش ولا لازم تركزي.

(تدخل ماما بقسوة)

ماما : إنتي رجعتي يا ملك حمد الله على السلامة .

هاه عمليتي إيه النهاردة؟ اتفضلي قولي .

ملك (تتهته) : ا. اشوية يا ماما .

ماما : يعني إيه شوية، حددي كلامك قوليلي إنتي أحسن ما أسمعها من المدرسين، اتفضلي قولي اتكلمي عكيتي الدنيا في مادة إيه النهاردة؟ علشان أعرف مين هيتصل بي يشتكيلي .

ملك (بلعثمة) : مدرس الرياضيات، ومدرسة الكيمياء،
وكمان الجغرافيا .

ماما : يا نهارك أبيض كل دول، كملي إشجيني ومين كمان ؟

ملك : ومدرس الأحياء ومدرسة العربي .

ماما : كده بقى باقي مين ؟ دى تقرييًّا كل المواد إنتى فاشلة فيها كلها،
أعمل إيه معاكى أنا تعبت .

ملك : (تضع يديها على أذنيها)

ماما : تعبت منك ومن كتر الشكاوي اللي بتجيلي من مستواي
الوحش في الدراسة، تقدرى تقوليلى أنا قصرت معاكى في إيه،
أنا ولا باباكي، ده إحنا بنديكى دروس في كل المواد.. كلها!

ملك : أنا عارفة يا ماما (وتختنق بالبكاء)، وآسفة بس ده غصب
عني صدقيني .

ماما : إزاي غصب عنك؟ ما إنتي لو بتركزى في مذاكرتك ودراستك
ولو بتديها وقت زى ألوانك وشخبطتك مكنش ده بقى حالي،
أنا مش عارفة إنتي إزاي كدا، ليه مطلعتيش زى إخوانك،
أخوكي حسام ما شاء الله بكالوريوس هندسة السنة دي
ومرتب على الدفعة، وأختك منة في طب الأسنان ومتفوقة
في دراستها، أخوكي وأختك مشرفني وسط عيلتي وأصحابي،
لكن إنتي للأسف خيبتي أملى فيكي.

ملك : آسفة يا ماما إني خيبت أمل حضرتك لكن ده غصب عني
(وتبكي)

ماما : آدى اللي باخده منك مفيش غير العياط أنا تعبت.. تعبت،
هدخل أحضر الغدا قبل ما يرجع بابا .

ملك : (بصوت منخفض) وأنا كمان يا ماما تعبت وعارفة إني مش
زى حسام ومنة وعمري ما هبقي زيهم، لكن صدقيني أنا
بحبك يا ماما وعمري ما اتعمدت أخذك أو أزعلك لكن
غصب عني، أنا بحاول.. بحاول كتير أبقي متفوقة زى إخواتي،
لكن مش بقدر المواد بالنسبة لي زي الأشباح بتطارديني حتي
في أحلامي، بتعب وأذاكر لكن إحساس الفشل في النهاية
بيقتلني، والنسيان وحش بيهدني ويكسرني، كتير فكرت لو في
عملية أبدل فيها مخي بمخ ثاني يسعفني ويرحمني من اللي
أنا فيه .

(يدخل بابا)

بابا : ملك حبيبة بابا رجعتي هاه عملتي إيه النهاردة؟

ملك : بابا حبيبي إنت اللي مهون عليا اللي أنا فيه ده كله، عملت
كالعادة زي كل يوم كل المدرسين عايزين يكلموكم علشان
يشتكوا لكم مني .

بابا : ولا يهملك يا حبيبة بابا بقولك إيه إديهم رقمي أنا بلاش رقم
ماما، إحنا ستر وغطا على بعض ما تقلقيش هظبطهوملك .

ملك : (بابتسامة) هتقولهم ايه؟

بابا : هقولهم كله إلا ملوكة دي قلب بابا إنتوا فاهمين، إوعوا حد
يضايقها أو يزعلها وإنتي عارفة بقي بابا مسيطر .

ملك : ربنا ما يحرمنى منك يا حبيبي إنت وإخواتي وألواني، بحس
معاكم اني إنسانة لكن ماما.

بابا : ماما بتحبك أوى يا ملك وعاوزاكي أحسن بنوتة .

ملك : عارفة يا بابا إنها بتحبني، ونفسها أكون ناجحة زى حسام
ومنة بس ما ينفعش أكون نسخة من إخواتي، ربنا خلقنا
مختلفين يا بابا .

بابا : فاهمك يا حبيبتى، ولا يهملك بكرة كل الناس تعرف وأولهم ماما
مين هي ملك .

ملك : بكرة الساعة كام يا بابا! (بسخرية) .

بابا : بنت وبعدين، أنا بابا إوعي تنسي هدخل أنا بقي لماما .

ملك : (تتحدث مع نفسها بسكينة) ياه يا بابا لو كل البشر زيك في
طيبتك وحنيتك .

(تدخل منة وحسام)

ملك : أهلاً يا حبابي، البيت كان وحش أوى من غيركم، طب كنتوا
تعالوا بدرى شوية .

منة : إيه يا ملوكة أخذتي محاضرة بعد الظهر؟

حسام : والله حاولنا نلحق بس المواصلات بقي، المهم قوليلي يا
صغنن في حاجة واقفة معاكي في الرياضة؟

ملك : هو في حاجة قاعدة أصلاً في الرياضة كله واقف يا هندسة.

حسام : ولا يهملك يا صغنن هنقعد الواقف كله النهاردة بعون الله،
ده إحنا جامدين أوي .

منة : وأنا بقي عليا الكيمياء والأحياء والفيزياء كمان يا ستي .

ملك : ربنا ما يحرمنى منكم معلش تعبتكم معايا .

حسام : وده اسمه كلام برده يا صغنن إنت تؤمر يلا بينا .

(يدخل الأب والأم)

ماما : إنت بتتكلم في إيه يا أحمد ما إنت مبتسمعش اللي بيتقال لي
في التليفون، شكاوى شكاوى بنتك دون المستوى بنتك مش
هتنجح، اسحبي ملفها.

بابا : وفي الآخر مش بتنجح؟

ماما : بالعافية يا أحمد .

بابا : دى قدراتها يا هدى وإحنا لازم نعترف بده، البنت مش مقصرة
بس دي قدرات ملناش إرادة فيها، دي بنتنا وحيبتنا وإحنا
شايقين انها بتحاول يبقي بلاش نكسرهما ونزود مشكلتها .

ماما : وهى ليه مش زى إخواتها ماشاء الله عمرهم ما تعبوني .

بابا : حسام ومنة غير ملك، إنتي ناسية نقص الأكسجين اللي حصلها
فى الولادة وهو اللي أثر على موضوع الدراسة، دي إرادة ربنا
بلاش نكون إحنا كمان ضدها، دى بنتنا وإحنا متقبلينها
وبنحبها مهما كان مستواها .

ملك دى نعمة ربنا علينا والخير كله دخل بيتنا بعد ولادتها .

ماما : مش بنكر ده بس إنت متخيل الموضوع وصل لدرجة إيه،
دول عايزيني أحولها دمج ! تخيل بنتي أنا أخت المهندس
والدكتورة تبقى دمج، أودى وشي من عيلتي وأصحابي **فين!**

بابا : ولا يشغلني إطلاقاً كلام العيلة والأصحاب، ولا ياخذ ذرة من
اهتمامي، بنتي ونفسيته رقم واحد بالنسبة لي .

وبعدين إيه المشكلة لما تبقى دمج، معلى مش بحب الكلمة
دي خليها تأخر دراسي دى قدراتها ولا يعيبها فى شيء، لكن على
المستوى الإنسانى بنتنا أجمل بنوتة وأطيب قلب .

ماما : عارفة يا أحمد وفعلاً ملك مثالية في كل حاجة عدا
موضوع الدراسة .

بابا : هدى أنا منحتش في الصخر واشتغلت كل حاجة لحد ما
طحنتني الدنيا علشان ولادى وفي الآخر كل اللي أطلع به
شهادات ورق أعلقها على الحيط، لأ ولادى مش مجرد ورق،
أنا تعبت علشان إبني أو بنتي يكون إنسان أفتخر بيه، إنسان
يا هدى ينفع نفسه وينفع بلده، علشان لما أقابل وجه كريم
أقوله يا رب أنا اجتهدت إني أحافظ على الأمانة اللي
أكرمتني بيها .

ماما : كفاية يا أحمد أرجوك.. أنا أد كده وحشة .

بابا : لا مش كفاية يا هدى، طب فاكرة كنتي بتعيطي أد إيه وتدعي
ربنا يخليها لنا .

ماما : أيوة يا أحمد فاكرة فاكرة .

بابا : خلينا نفرح بعطاء ربنا .

(تدخل ملك)

ملك : وأصحي تاني يوم علشان أروح المدرسة، ما هو لازم أروح..
مضطرة أروح .

ماما : صباح الخير يا أجمل ملوكة .

ملك : (باندهاش) أجمل ملوكة!! دى أنا !! ماما إنتي كويسة! فين
محاضرة الصباح !!

ماما : حقك عليّ يا حبيبي، أنا عمري ما هزعلك تاني ولا هضغط
عليكي، أنا عارفة إنك بتجتهدى ومش بتقصرى ومهما كانت
نتيجتك أنا راضية بيها وفخورة بيكي يا ملاك بيتنا .

ملك : ماما قوليلي اني مش بحلم، ياه يا ماما أنا دعيت ربنا امبارح
كتير أوي إنك متزعليش مني وتحبيني .

ماما : يا حبيبي يا بنتي (تحتضنها) .

ملك : مع السلامة يا أحلي ماما، أنا نازلة المدرسة .

(تدخل معلمة الرسم)

معلمة الرسم : فين الطالبة ملك أحمد؟

(تخرج ملك بتأفل)

ملك : أيوة يا ميس اتفضلي رقم بابا .

معلمة الرسم : رقم بابا ! بس أنا مطلبتش منك الرقم لسه .

ملك : ما أنا خلاص اتعودت يا ميس، وحضرتك أكيد عايزة تكلميه
علشان تشتكي من مستوايا .

معلمة الرسم : أنا فعلاً عايزة أكلمه بس علشان أقوله شكراً لأنك
جبت لنا أجمل فنانة، وأستأذنه إن رسوماتك هتشارك بيها
في معرض للفنانين في مكتبة إسكندرية .

ملك : نعم! حضرتك بتقولي إيه!! أنا فنانة؟ أنا ملك أحمد حضرتك
متأكدة؟ تقصديني أنا؟ أنا مش مستوعبة اللي بسمعه .

معلمة الرسم : أيوة بقصدك إنتي بجد رسوماتك رائعة، إيدك إيد
فنانة محترفة مش إيد طالبة في أولى ثانوي، إنتي بينتظرك
مستقبل كبير في مجال الرسم .

ملك : أنا متشكرة جداً ل حضرتك، بجد حضرتك مش متخيلة كلامك
ده عمل إيه معايا .

أنا أخيراً لقيت نفسي.. أخيراً لقيت ملك .

أخيراً حسيت إني ناجحة في شيء .

أنا موجودة أيها العالم .

أخيراً لقيت نفسي.. من النهاردة أنا بحب الدنيا والمدرسة حتى
المدرسة هحبها .

(وتجري في المكان وتنادى بأعلى صوتها)

ماما. ماما حبيبتي. بابا حبيبي يا بابا، حسام يا حسام يا منة يا حبيبتي.

أنا خلاص لقيت نفسي.. أنا لقيت نفسي .

أخيراً شوفت طاقة أمل ...

أين طفولتي

تاقت طفولتي وتلاشت

في زحام الكتب والأقلام

فنسيت أني طفلة

أنا مين!! ما أنتم شايفين بنت صغيرة من بين ملايين تعبت
زهقت طهقت، وأنتم شايفين وسامعين وإيديكو على خدودكم
حاطين، ليه يا بنتي؟ ليه يا قطة! بس يا عم جبتوا لي جلطة هيبية
وأقول إيه ولا إيه .

دى حاجات زادت عن الحد يا بيه ..

تعرف حضرتك تعرفي سيادتك كان نفسى في إيه ..

كان نفسى أكون طفلة أيوة متستغربوش ..

كان نفسى أكون طفلة مش طفلة في الشكل بس، طفلة في
المشاعر طفلة في الحرية .

طفلة.. مجرد طفلة عايشة حقيقة طفولتها مش رايحة جاية
شايلة على ظهرها شنطتها، حنت ظهرها وكعبلت خطوتها .

أول ما دريت لعقلي جروني على حضانة فيها دادة دايماً غضبانة
وميس تعبانة وزهقانة، إنتي يا بنت إنت يا ولد، اسكتي يا بنت
اسكت يا ولد، اکتبي يا بنت اکتب يا ولد .

وکتبت. کتبت. کتبت لحد ما تعبت، وصدقوني لحد ما کرهت
الکتابة، وياما جالي مغص آه يا بطني، أوجبت أنا المغص علشان
أخلص من الحضانة .

لكن في الآخر كنت بنزل كل يوم، كانوا بيخنقوا جوايا الطفولة..
خنقوها جوايا.. خنقوها جوايا.. وحرموني، ودخلت المدرسة
أقولكم سر وياريتني ما دخلتها برا سورها الفرحة سيبتها .

الأستاذ من أول يوم صباح الخير يللا يا حلوة إكتبي، يللا يا
شاطرة اكتبي يللا يا بطة اكتبي

اكتبي اكتبي اكتبي اكتبي تعبت، هو أنا جاية الدنيا علشان اكتب
نفسي. نفسي ألعب .

تعرفوا أقولكوا سر كنت بحلم أكون لاعبة جمباز مشهورة، أيوة
كان حلمي ألاقى في مدرستي ملعب كبير ومدرين للألعاب الرياضية،
هص اسمعوا ده جرس الفسحة دلوقتي حصة الألعاب هيبه هيبه
هنلعب هنلعب .

صفا: ميس ميس نفسي ألعب يا ميس أنا بعمل حركات جميلة .

ميس الألعاب: لعبت عليكي نفسك، إنتي وهو وهي إنتوا جاين
المدرسة علشان تلعبوا ولا إيه، اقعد يا ولد اسكتي يا بنت،
تعالى هنا (وتمسكها من أذنها) مين علمك الحركات دى يا
بنت، إنتي مش عارفة إن دى مدرسة محترمة ولا إيه، حركات
إيه وجمباز إيه، اقعدى يا بنت، بنت بقولك إيه انا حامل
وتعبانة، آه يا بطني.. آه يا ظهري يا أنا .

صفا: لحد ما ماتت في موهبة الرياضة .

ويا ما كان نفسي وأنا في المدرسة إني أقعد، متستغربوش أيوة
كان نفسي أقعد في الديسك وأنا مرتاحة مش مزنوقة مفعوصة بين
بنتين مليونين، وفصلي قولوا فيه خمسين ستين سبعين قاعدين زي
مزنوقين مش فاهمين .

وكان نفسي كمان وأنا في المدرسة.. يا نهار!! كان نفسي أدخل
الحمام وأنا مش حاطة منديل على مناخيري .

وده اللي بيحصل في المدرسة، ما بالكم بقي باللي بيحصل في
البيت، أروح البيت تقابلني ماما .

ماما : إنتي جيتي يلا بسرعة غيرى هدموك، ومش هتلقني تاكلي
لان الأكل لسه على النار متقاطعينيش، أنا ما اتاخرتش بابا
هو اللي اتأخر لحد ما جاب الغدا بتبرطمي بتقولي إيه؟
آه بحسب .

ماما : يلا خدى شنطتك وروحي على درسك .

صفا : الله شنطة تاني انا تعبت تعبت .

ماما : إيه ده يا بنت عيب كده، إنتي كده مهملة عايضة تبقي خايبة
ولا إيه، آه يا ميلة بختي يا أنا يا أمه، عايضة الجيران يشمتوا فيا
ولا قرايبي يضحكوا عليا ولا إيه؟

صفا : وأشيل الشنطة وأروح الدرس، أخذت إيه مش عارفة.. كتبت
إيه مش فاكرة.. الكتابة كثير متعدوش والمواد أكثر ما
تسألوش .

وأرجع البيت يا سلام ما أصدق، أرجع البيت ألاقي مين؟ ألاقي مين؟ ألاقي بابا .

صفا : بابا بابا وحشتني وحشتني أوى يا بابا مشوفتكش طول النهار أنا تعبت أوى يا بابا .

بابا : هه يا حبيبتى عاملة إيه بخير؟ وأحوالك إيه تمام؟ الأولي طبعا أنا بنتي لازم تبقي الأولي، عايز أفتخر قدام زميلي في الشغل، ألا بالمناسبة إنتي في سنة كام السنة دي؟

صفا : في سنة كام السنة دي !! مش فاكرة يا بابا .

بابا : مش مهم.. مش مهم المهم إنك تبقي كويسة .

صفا : بابا نفسي .

بابا : هه يا حبيبتى نفسك في إيه؟ شيكولاتة بسكوت مصاصة هه، نفسك في إيه وأنا أجيبلك كل اللي نفسك فيه الشهر الجاي إن شاء الله .

صفا : الشهر الجاي!! بابا نفسي أتفسح معاك، نروح جنينة نركب ملاهي نتنطط ونفرح.

بابا : بس كده من عينيا يا حبيبتى، في أجازة آخر السنة إن شاء الله، بس إبقى فكيري هه أوعي تنسي .

صفا : هه عرفتوا ليه أنا مش طفلة .

خنقتوا الطفولة جوايا

وحولتوا حياتي لقلم **وجومة** وبراية

يا ناس يا هوو حد يحس بيا حد يقف معايا

كان نفسى في كورة وعروسة صعبة هي الحكاية

مش طالبة مصروف زيادة

ولا عايزة أعيش في سراية

طالبة شوية حنية محتاجة منكو الرعاية

إحيوا طفولة اتخنقت اتقتلت بإيديكو جوايا

الباب الثاني

مواقف تربوية

هيا نتعلم قيمة جميلة

أو خلق رفيع

هيا نسلط الضوء معاً على سلوكٍ خاطئ

قد نقع فيه دون أن نشعر

تعالوا لنمر سوياً بمواقف تربوية

أنا محتاجك

سارة : إيه يا بنات عاملين إيه .

مريم : الحمدلله يا سارة إنتي جاهزة ولا لسه ؟

سارة : جاهزة ليه عندنا خروجة ولا إيه هنتفصح أنا فعلاً طالبة معايا النهاردة خروجة .

مريم : خروجة إيه يا سارة، إنتي لحقتي تنسي النهاردة يوم اليتيم .

سارة : بيبه يوم اليتيم إيه بقولك زهقانة محتاجة أغير عايزة أتفصح .

مريم : إحنا كل ما بنزهق بنقدر نتفصح سواء مع بعض أو مع بابا وماما، تعالي نجرب إننا نفرح الأطفال الأيتام حتى لو يوم واحد .

سارة : وأنا مالي بالأيتام هو أنا ناقصة غُلب ياربي بقولكم إنتوا صحابي و انا زهقانة .

بسملة : وعلشان إحنا صحابك بقولك تعالي معانا، تعالي جربي ترسمي الضحكة على وجوه مسكينة اتحرمت من العطف والحنان والعيلة .

مريم : علشان إحنا صحابك هتيجي معانا يمكن نحس و لو شوية بالنعم اللي عندنا و عُمرنا ما بنحمد ربنا عليها .

سارة : يا جماعة أنا معنديش روح ولا وسع للمواضيع ديه فككم مني خلاص، روحوا إنتوا صدقوني مش زعلانة يعني ممكن أقعد على الفيس شوية أهو أضيع الزهق .

بسملة : طيب خلاص الموبايل معاكي، وهتقدي على الفيس براحتك بس تعالي معانا .

مريم : صدقيني محدش هيضايك.

سارة : بس بقولكم إيه يا ولاد اللي في دار الأيتام دول مليش دعوة
بيهم خالص.

بسملة : اتفقنا.

سارة : لو حد ضايقتني أنا مش هسكت.

مريم : تمام تمام يلا بينا.

(يجلس الأطفال على مقاعد صغيرة تدخل مريم وبسملة بحب و فرحة
و يحتضنوا الأطفال و يلعبوا معاهم بينما تدخل سارة وهي
مشمزة و غاضبة).

تقترب طفلة من سارة...

الطفلة : ممكن تلعب معايا

سارة : مين بتكلميني أنا.. بس أنا.... .

الطفلة : أنا اسمي فرح إنتي اسمك إيه.

سارة : أنا سارة.

فرح : إنتي ليه زعلانة يا سارة؟ مش عايزة تلعب معايا.

سارة : لا ابدأ يا حبيبتي.. أنا... أنا هلعب معاكي.

فرح : بس بشرط هنادي كل صحابي يلعبوا معاكي.. إنتي جميلة أوي.

سارة : خلاص يا حبيبتي ناديهم كلهم... ناديهم يا فرح قولي لهم سارة
بتحبكم كلكم، سارة مش هتسييكم تاني دائماً هكون معاكم.

(يلعبو جميعا بفرح وسعادة) (أغنية و بنحبك يا دنيا بجد)

جالي موبايل

تدخل جنات و هي سعيدة بالموبايل الجديد.

جنات : ياه أخيراً جالي الموبايل اللي كنت بحلم بيه لو تعرف أنا تعبت قد إيه لحد موصلتك (تنظر للموبايل)، إنت عارف أنا تقريباً مكنتش بنام عشان أحقق أفضل نتيجة وبابا يجيبك ليا يا حبيبي... أعمل إيه... أعمل إيه أنا فرحانة أوي نفسي أعمل بيك حاجات كتيرة.

يدخل الشيطان :

- هاها.. هاها تعاليلي بقى وأنا أقولك تعملي إيه بالموبايل الجديد.

جنات : إيه هه... إيه أعمل بيه إيه.

الشيطان : أهم حاجة تنزلي الفيس بوك و التيك توك والانستا واليوتيوب والفابير عليه وبسرعة.

جنات : فعلاً.. أنا هعمل كده .

الشيطان : أه مش عايزين نضيع وقت، لازم كل الناس تعرف وبسرعة إنك جالك موبايل جديد.

جنات : تمام تمام بس الفيس مش هيعطني عن المذاكرة.

الشيطان : لا ابدأً - خالص بالعكس و خليه حتى وقت الفراغ ده هيساعدك على المذاكرة.

جنات : يساعدي إزاي.

الشیطان : أیوة طبعاً إنت مش هتتكلمي مع زمایلك.

جنات : آه.

الشیطان : وهو فيه أكثر من كدة مذاكرة.

جنات : بس ماما هتزرعل مني هتقول إنتي كدة هتضيعی وقتك.

الشیطان : **الحاجة سيبي الموضوع ده عليا** قولي لها إنك منزلة برنامج الترجمة و ده طبعاً هيساعدك في المذاكرة.

جنات : بس ده مش حقيقي.

الشیطان : یعنی هي الحاجة هتعرف إنتي بنتترجمي ولا قاعدة على الفيس بوك ، بلاش حتى أقولك حاجة أحسن قوليلها بدخل منه على اليوتيوب و بشوف شرح الدروس یعنی إنتي هتغلبني ولا أنا هأعلمك... لازم تتحركي شوية.

جنات : أسيف طيب أرقام زميلاتي.

الشیطان : بنات بس .

جنات : آه طبعاً بنات بس.

الشیطان : إيه ده و فيها إيه لما تكلمي ولاد إنتي عايزة زمایلك يقولوا عليكی معقدة ولا إيه خلي عندك ثقة في نفسك.

جنات : لأ طبعاً أنا عمري ما عملت كده.

الشیطان : جربي مش هتخسري حاجة وبعدين يا ستي اتكلمي معاهم بكل احترام .

جنات : بس ماما و بابا واثقين فيه.

الشیطان : یعنی ہما ہیشوفوکی عیثی حیاتک و عیثی سنک .

جنات : لأ مش ہیشوفونی بس فیہ اللی عینہ ما غفلت عنی

بیشوفنی فی کل مکان وفی کل لحظة ربنا... الرقیب .

الشیطان : (یمسک برأسه یتأوه.. آه.. آه) .

جنات : عرفنی الحلال و عرفنی الحرام و ساب لی الحریة الكاملة

فی الاختیار وأنا مش همشی إلا بأمره و مش هبعده

عن طریقہ .

الشیطان : آه.. لأ.. لأ .

جنات : وبابا وماما اللی إدونی ثقتہم لازم أكون قدها ولأزم أشرفہم

وأحافظ علی نفسی کویس ، علشان أكون جدیة باحترامہم

و جدیة باحترام نفسی واحترام الناس و هصبر لحد ماربنا

یرزقنی بالحلال ، أنا حاجة عالیة و ثمینة لازم أصون نفسی

أنا (مش رخیصة) .

الشیطان : لأ اسمعی الكلام .

جنات : أنا عرفتك إنت الشیطان .

جنات : أعوذ بالله من الشیطان الرجیم .

الشیطان : آه...آه...و یهرب .

جنات : أعوذ بالله من الشیطان الرجیم... یارب ثبتنی **واعصمی**

واحفظنی .

كن نظيفاً

تدخل سلمى و هي ممسكة بقصافة و تنحت بها في الحائط

ميرنا : إيه ده .. بتعلمي إيه يا سلمى.

سلمى : أبداً بكتب اسمي على الحيطه.

ميرنا : و بتنحتيه في الحيطه كمان.. ليه؟

سلمى : إيه يا بنتي هيكون ليه يعني .. ذكري.

ميرنا : و ده ليه بقى؟

سلمى : إنتي عبيطة يا بنتي .. لازم كل الأجيال اللي تدخل المدرسة

بعدينا تعرف إن سلمى كانت في المدرسة هنا (بالفخر).

ميرنا : كل الأجيال تعرف ده يعني باسمك الي هتبوظي بيه

شكل الحيطه.

سلمى : آه طبعاً.. وبعدين اسمي بيجمال الحيطه مش بيبوظ شكلها.

ميرنا : اسمك جميل طبعاً بس إنتي ممكن تخلي الأجيال اللي جاية

تعرف إن كان فيه سلمى هنا بحاجات تانية كتير وأعظم من

إنك تشوهي الحيطه باسمك.

سلمى : أشوه الحيطه ! وإيه بقى الحاجات الأعظم ديه.

ميرنا : اعلمي حاجة تفضل باقية في المدرسة.. وسيلة تعليمية مثلا
تفيدي بيها زمايلك و اللي يجوا من بعدك و اكتبى عليها
اسمك يا ستي... ارسى لوحة جميلة زيني بيها المدرسة
ديه الحاجات اللي ذكرى.

سلمى : تصدقي إنتي بدأتي تأثري فيا شوية كده يعني بس مش كثير
(تاكل شيبشى).. تاخدي شيبسى يا ميرنا.. ولا مش بتحبيه..
(وترمي الكيس على الأرض)

ميرنا : إيه اللي بتعمله ده يا بنتي؟ ما الباسكت قدامك أهو.. ليه
مُصرة تشوهي شكل المدرسة؟

سلمى : نعم؟ يعني هو كيس شيبسى اللي هيبوظ شكل المدرسة؟

ميرنا : إحنا كام طالبة هنا في المدرسة تفنكري؟

سلمى : مبعدهش يا جيمي.. سوري قصدي يا **ميرنا**.. هم كثير.

ميرنا : فعلاً كثير حوالي ٥٠٠ طالبة.

سلمى : يا لهوي!!

ميرنا : لو كل واحد منهم رمت كيس شيبسى أو بسكوت تخيلي شكل
المدرسة هيبقى إزاي.

سلمى : دي مش هتبقى مدرسة.. دي هتبقى مقلب زباله يا أمه.

ميرنا : أهو إنتي قولتي بنفسك.

سلمى : يا أختي ما كله بيعمل كده.

ميرنا : تعالي نبدأ بنفسنا و نعرف زميلاتنا و نرجع العادات الجميلة،
تاني زي النظافة .

سلمى : عندك حق والله يا أختي..ده أنا لما بدخل الحمام بتعب نفسيًا
من اللي البنات بيعملوه فيه.

ميرنا : المهم إنتي بتحافظي على نظافته بعدك ولا لأ،

سلمى : أنا!! لأ طبعاً..وأنا مالي.

ميرنا : تاني يا سلمى.. تعالي نبدأ بنفسنا إن شاء الله هنعمل فرق.

ده ربنا بيقول : "إِنَّ اللَّهَ لَا يُغَيِّرُ مَا بِقَوْمٍ حَتَّى يُغَيِّرُوا مَا بِأَنْفُسِهِمْ"

سلمى : ماشي يا ميرنا خلاص ..مش هكتب تاني على الحيطه
أوعدك..بس هي فين هي فين؟؟

ميرنا : هي إيه.

سلمى : التخته بتاعتي عشان أكتب عليها اسمي ذكرى وكده يعني

ميرنا : تاني يا سلمى تاني.. !!

كوني صريحة

منى : (تدخل وهي تبكي بصوت مرتفع)

جنة : إيه يا منى مالك في إيه؟

منى : خلاص مفيش فايذة.....مفيش فايذة.

جنة : مفيش فايذة ليه و على إيه؟

منى : أنا هسقط خلاص هسقط مفيش كلام.

جنة : ليه بس كده يا منى متقوليش كده إنتي ممتازة ما شاء الله.

منى : دا كان زمان أيام الإبتدائي و بصراحة الإبتدائي حمادة

والإعدادي ده حمادة تاني خالص .

جنة : اهدي بس يا منى و تعالي نتكلم بالعقل شوية، إيه المادة اللي

عندك فيها مشكلة؟

منى : كلهم كل المواد آه يانا هسقط يانا.

جنة : مش معقول أنا شايفة غير كدا.

منى : مين قالك ها؟ قوليلي مين الباردة من زمايلنا اللي تقول عليا

بذاكر ولا مدرس مين اللي قال عليا كدا.

جنة : إيه يا منى مفيش حاجة من ده خالص كل ما في الموضوع

إني شايفة مستواكي كويس.

يوم الامتحان

منى : الحقيبي يا جنة هسقط.....هسقط.

جنة : بس يا بنتي تفاعلي كدا وهدى أعصابك ربنا معانا.

منى : (تجلس وتُجيب بسرعة و تكتب كثيراً وتلقت حولها وهي تحجب إجابتها)

جنة : (تجلس تجيب بهدوء وطمأنينة)

المراقب يجمع الورق

منى : آه ياني هسقط.....هسقط

جنة : ليه يا بنتي انا شايفاكى بنكتبي طول اللجنة.

منى : كله غلط يا لهوي هسقط

المدرس: جنة ٥٠/٥٠ ،، منى ٥٠/٤٥.

منى : ليه...ليه! دا انا مسبتش سؤال الا لما جاوبته دا أنا حافظة

الكتاب صم! دي الكتب اتقطعت من كتر المذاكرة.. ليه يا ربي

كدا ليه!! دا أنا حفظت حتى الإرشادات اللي في ظهر الكتاب

ليه يا ربي.

جنة : علشان كان لازم تكوني صريحة...ليه تتلاءمي و تخبي!! إحنا

هنا اخوات مش أعداء.

(يأتي والدها ووالدتها لإصطحابها من الامتحان)

جنة : حتى دي كمان كنتي بتكديبي فيها !!

آسفة يا ماما

- الأم : يللا يا ميرنا اصحي يا حبييتي هنتأخرى على المدرسة.
ميرنا : لو سمحتي عايزة أنااام.
الأم : إنتي نمتي كفاية يا حبييتي يللا ميعاد المدرسة.
ميرنا : مدرسة إيه وغُلب إيه سيبيني أنام.
الأم : معلش يا روح ماما (وتقبل جبينها).
ميرنا : إيه ده ع الصبح كده إنتي مبتزهقيش؟
ماما : عمرى ما أزهق منك يا حبييتى ده إنتى بنت عمري.
ميرنا : بييه هنبدا الاسطوانة دى تاني عارفة إنك مخلفتيش غيرى
حفظناها خلاص.
الأم : طيب يا حبييتي يللا علشان متتأخرش.
ميرنا : يا ماما أنا صحيت خلاص بصي عينيا مفتحة أهه.
الأم : أنا حضرت الفطار يا ميرنا.
ميرنا : (تقاطعها) مش هفطر سمعتيني مش عايزة يا ستي.
الأم : أنا صليت الفجر ومستنياكي فطر سوا حتى مخدنتش
الدوا بتاعي.
ميرنا : وأنا مالي أنا مطلبتش منك تستنيني افطرى إنتي.
الأم : خلاص يا حبييتي خدى سندوتشاتك طيب.
ميرنا : إيه جبنة وحلاوة زى كل يوم؟
الأم : معلش يا ميرنا ده اللي بقدر عليه يا حبييتي.
ميرنا : وأنا مالي نفسي اكل زى بقية أصحابي.

ميرنا : برجر، شاورما، بوفتيك.

الأم : حاضر يا حبيبتي ربنا يرزق بابا وأعمك اللي نفسك فيه.

ميرنا : وياريت جات على الاكل بس، أهو ده محدش بيشفوفه لكن شكلي ومظهري.

الأم : وماله مظهرك ده إنتي بسم الله ماشاء الله أجمل زمايلك.

ميرنا : عارفة إني أجمل زمايلي لكن أقلهم في اللبس.

- عايزة لبس جديد سمعتيني ؟ محتاجة لبس.

الأم : حاضر يا ميرنا أنا عاملة جمعية لما آخدها أجيبك منها اللي إنتي عايزاه.

ميرنا : أهو إنتي قولتي لما أقبض الجمعية ليه مش كل لما أحب حاجة مجيبهاش على طول ليه؟ جاوبيني ليه!

الأم : يا بنتي إحنا أحسن من غيرنا احمدى ربنا، شوفي الناس اللي في الشارع معنا إحنا أحسن منهم كثير.

ميرنا : وليه أشوف الناس اللي في الشارع؟

- شوفي إنتي الناس اللي راكبين عربيات وبيصيفوا في أوروبا

ولا في الساحل الشمالي ولا في العلمين إحنا مش زيهم ليه؟

الأم : يا بنتي ربنا قسم الأرزاق، وكل الناس في النهاية زى بعض منهم اللي إداله المال، ومنهم التعليم، ومنهم الجمال.

- ولازم كلنا نرضى بعبائه وفضله علينا وإحنا الحمدلله مستورين.

ميرنا : خلاص يا ماما خلاص حفظت الكلمتين دول صدقيني قدموا أوى، بقولك إيه أنا مش رايحة المدرسة النهاردة.

الأم : ليه بس يا ميرنا هيفوتك حاجات كثير يا بنتي.

ميرنا : أهو مليش مزاج أنزل النهاردة.

الأم : طيب يا ميرنا تساعديني بقي في تنظيف البيت.
ميرنا : بيبيبييه بقولك مليش مزاج أنزل يبقى أكيد مليش مزاج أعمل
حاجة وخصوصاً تنظيف البيت سيبيني بقي أنام.
(وتنام ميرنا وبينما هي نائمة ترى أمها وهي تنظف البيت بارهاق
وتثاقل ثم تضع يدها على صدرها الأيسر وتسقط أرضاً)
ميرنا : ماما... ماما لا يا ماما أرجوكي قومي يا ماما أنا آسفة.. أنا
جيت أهو أساعدك.

يا ماما يا جميلة يا أحن إنسانة في الدنيا

- عمرى ما سمعتك بتشتكي عمرى ما شوفتك بتطلي حاجة لنفسك.
- دايماً راضية ومبتسمة وأنا... أنا دايماً ساخطة ومش راضية
وإنتي دايماً صابرة عليا.
- دايماً بزعلك، عمرى ما قولت لك إني بحبك.
- ماما أنا بحبك، بحبك أوى يا ماما.
- أرجوكي متسيبينيش لوحدى.
- أنا آسفة يا ماما سامحيني.
- ياريت تسامحيني، سامحيني يا أحن وأطيب قلب.
- أنا آسفة يا ماما

الأم : مالك يا ميرنا مالك يا حبيبتى سلاماً قولاً من رب رحيم.
ميرنا : إيه ده ماما حبيبتى ده كان حلم الحمدلله.
- الحمدلله يا ماما إنتي كويسة.
- ماما أنا آسفة يا حبيبتى سامحيني.

ورجعنا المدرسة

سهيلة : صباح الخير يا هاجر ... عاملة إيه؟

هاجر : الحمد لله بخير خلاص بدأت الدراسة بسرعة رهيبية.

سهيلة : ومالك بتقولها بحزن كده؟

هاجر : طبعاً بحزن .. هو الصحيان بدري للأسف و النوم بدري

غصب عني (حسبي الله و نعم الوكيل) والمذاكرة

والدروس كل ده مش بيحيب الحزن.

سهيلة : سيبك إنتي كفاية إن إحنا هنا إخوات و زمائل.

هاجر : عارفة يا ستي والله إنتو فعلاً كلكم وحشتوني بس يا سهيلة

الأجازة حلوة نوم كده وراحة.

سهيلة : أنا عارفة إن الدراسة مُتعبة وصعبة بس هي دي الوسيلة

اللي هتخلينا نحقق هدفنا اللي طول عمرنا بنحلم بيه،

- إنتي بقي نفسك تعملي إيه؟

هاجر : نفسي آكل، أيوه الصراحة نفسي آكل وأتفرج على
مسلسلات تركي وأنام.

سهيلة : اللي هينام مش هيوصل يا هاجر، وأنا عارفة إنك نفسك
تكوني حاجة.

هاجر : فعلا أنا طول عمرى بحلم أكون (بس ما تستغريش) بحلم
أكون مدرسة أطفال، أعاملهم كويس وأوصلهم المعلومة
بطريقة جميلة

سهيلة : وأنا يا هاجر طول عمرى بحلم أكون باحثة وتكون لي
إضافة جديدة في البحث العلمي تخفف آلام مريض
أو تحقق حاجة للناس... نفسي.

هاجر : عندك حق يا سهيلة الطموح ده حاجة جميلة أوى.

سهيلة : يلا بينا إحنا كده هياخدنا الطموح زيادة ونتأخر
على الحصة.

هاجر : يلا بينا.

شوف جمال اللي حوايك

(تدخل هبة وهي تضحك بهيستيريا)

جنة : إيه يا هبة مالك في إيه؟

هبة : (تواصل ضحكها) مش ممكن لبس ميس نهى النهاردة لأ بجد
لو كال جدًا، إيه ده هيا مش بتبص لنفسها في المراية قبل ما
تنزل بدل ما تخلينا مش ماسكين نفسنا من الضحك كده، ياه
على الضحك.

جنة : بس يا بنتي مش كده اهدى.

هبة : لا أصلك مشوفتيش الجيب بتاعها ولا الشوذ حاجة تحفة بجد.

جنة : خلاص يا هبة.. خلاص بلاش ميس نهى إنتي عارفة إنها
أكثر حد بيشرح كويس في المدرسة.

هبة : أنا مليش دعوة خالص بشرحها يا جنة.

جنة : دي أهم حاجة بالنسبالنا، لكن أي حاجة تانية تخصها هي.

هبة : يا بنتي إحنا في مدرسة بنات، فاهمة يعني إيه؟ وهي لازم
تراعي ده كويس.

جنة : إنتي كده بتبالغي بصراحة.

(تدخل شهد) ...

شهد : إيه يا بنات صباح الخير عاملين إيه؟

(تراها هبة تنفجر في الضحك)

جنة : بس يا هبة عيب كده في إيه؟

شهد : في حاجة يا هبة! بتضحكي ليه لما شوفتيني؟

هبة : أسفة يا شهد مفيش حاجة، مش قادرة يا ربي.

جنة : خلاص يا هبة من فضلك كده كثير.

**هبة : هي مسمعتش عن حاجة اسمها جيم ولا إيه، تلاقيها مخصصة
أكل البيت كله.**

**شهد : على فكرة يا هبة أنا سمعتك، وسمعت طبعاً عن الجيم بس
من غير ما تضحكي وتسببي لي الأذى النفسي ده.**

- **كان ممكن تسأليني بأسلوب أطف من كده من غير ما
تجرحيني. احنا زمايل يا هبة يعني إخوات.**

هبة : أسفة يا شهد بجد أسفة غصب عني.

**جنة : معلش يا شهد متزعليش إنتي عارفة إحنا بنحبك أد ايه
وكل الفصل بيحترمك لإنك فعلاً إنسانة جميلة.**

**شهد : شكراً يا جنة، أنا عارفة إنك راقية وعمرك ما زعلتي حد،
بس أحب أقولك يا هبة إن زيادة وزني مش سببها الأكل
خالص، أنا عندي مشكلة في الغدد وبتعالج منها والدكاترة
بيقولوا إنني هتحسن إن شاء الله.**

هبة : معلش يا شهد غصب عني والله.

شهد : وعلي فكرة يا هبة باباكي مسؤول عن البوفيه في الشغل عند بابا وأنا عارفة من زمان وعمري ما فكرت أقول لحد من زمايلنا ولا حتي أقولك علشان ما أجرحكيش وأحافظ على مشاعرك

هبة : إيه ده إنتي عرفتي!! بجد أنا أسفة وأرجوكي يا شهد محدش من البنات يعرف أرجوكي.

شهد : متقلقيش يا هبة لو كنت عايزة أعرف البنات كنت قولت لهم من زمان لكن أنا بحبك، إحنا زمايل وإخوات لازم نخاف على بعض، ونحترم بعض، ونقدر ظروف بعض.

جنة : أبوة يا هبة ومدرسينا زي بابانا ومامتنا تحبي حد يضحك على باباكي او مامتك؟

هبة : طبعا لا.. عندكم حق إنتو الاتنين أنا إزاي كنت كده!

- أنا ندمانة على كل اللي عملته ومش عارفة أعمل إيه.

شهد : خلاص يا هبة، تعالي نتعاهد إننا نخلي عينينا جميلة نشوف بيها جمال اللي حوالينا، ونستر بيها عيوبهم.

أكيد هنعلم فرقهم، هنعرف ونفرض اللي هو حوالينا.

الباب الثالث

خواطر شعرية

مناجاة

نبيع الخلود بثمن بخيس

ونهوى الحياة بعيش تعيس

فيا نفس صبرا عن المعاصي

ما بقبرك سوى ما فعلت جليس

ينوء ظهري بحمل الخطايا

سواك الهي ما من مغيث

تعاضم ذنبي فأظلم دربي

الهي بنورك تضيء الدروب

أتوق لقربي منك ربي
ولكن عنك تحجبني الذنوب
فشوقا لدمع يغسل ذنبي
ينفس بكرمك كل الخطوب
يطول أمامي ليل المعاصي
فهلا بفجر ينير القلوب
أمد إليك يدي بخجل
و أرجو منك ستر العيوب
إذا كان حبك للطائعين
فرفقا بقلب أنهكته الذنوب
حيائي منك يبعدني ويجذبني
فمنك إليك يطيب الهروب

بزغ الفجر

بين جبال قاسية وقلوب عاتية بزغ الفجر

نور براق يتلألأ في قلب الظلمة والكفر

رقراق عذب ينساب برفق كالسحر

فرحت به كل الخلائق حتي الدواب والشجر

وتغنت به الأطيوار فرحا وابتهالاً في السحر

هذا محمد قد أتى للكون هو خير البشر

طفل يتيم جهل قدره لم يلق حناناً من مرضعة

إلا حليلة قبلته جبراً من ظروف موجعة

فإذا الحمار قد عاد شاباً مسرعاً ما أروعه

وضرعها ملئ خيراً والرزق قد أقبل معه
والأرض بعد جفافها نبئت وصارت تلمعا
قد عمها خير الصبي فصار عيشها أمتعا

وبينما يلهوأتي جبريل شق صدره إذ أضجعه
أخرج منه كل سوء فعاد قلبا أنصعا
وعاد الصبي لأمه في كنف جد ما أروعه

خرجت به لتزور قبر أبيه وما عادت معه
طفل صغير غدا يتيم الأم والأب معا
ما ذاق رغد العيش ما كان يوماً في سعة

ومات جده زاد يتمه بعد شيخ ودعه
في كنف عم ذي عيال وفقر أوجعه
عمل صغيرا من حياته حاز خلقاً رائعاً
عاش بكد وتعب وصار شاباً يافعاً
لم يله مثل رفاقه بل عصمه رب معه
شمس أضاعت شعاب مكة وبالطهر ناصعة
عجبت خديجة من فضائله ورأت به مغنما
تزوجته شريفة ما صدها فقره وكان زوجها ملهما
تزين بالخلق الرفيع محمد في الأرض والسما
خلوة في الغار تطفئ لهف قلب مفعما
حتي أتى جبريل اقرأ يا محمد قد صرت معلما
عاد الحبيب إلى خديجة دثرتني وكان فزعه ملجما

طمأنته وثبته لا تخف بالخير قلبك منعمًا

قال ابن نوفل يا محمد صرت النبي الخاتما

عظمت رسالتك وليتني حياً إذ يخرجوك مدعماً

هذا محمد بأبي وأمي زاده الكفر العنيد ترحمًا

قام يدعو قومه رفقاً وحباً رغم كفر ومجون

ما صده قذف بطمع أو بسحر او جنون

قد صدهم كبر وكفر مارق أعمي قلوبا والعيون

بسطوا يد التنكيل والقهر لمن آمن ما غمضت جفون

هذا بلال حرقوه على الرمال وآل ياسر صبرهم زاد الجنون

تزداد قسوتهم سعارا في شعب طالب قد جاعت بطون

عملوا بجهد لحجب نور الشمس وقد خابت ظنون

ما عاد في القلب العظيم مكان كره أوحسد

راح المدينة هاجراً للكفر فكان نصر وجلد

هب للإيمان ريح فانجلي الكفر وولى لم يعد

ادخر لأمة الشفاعة يوم لا يغني الولد

وحين واقته المنية أتى جبريل مخيراً فاختار الصمد

حبيبي يا خير الورى عشت حياتك في كبد

تعب الجسد لكنما هنأت روحك بجوار الأحد

صلوا عليه

جانا محمد شق ظلام الكفر نور
بلسم يداوى للعالمين رحمة وخير

صلوا عليه

لو كان حبيبنا وسطنا كان حالنا ايه
يا كل احباب النبي صلوا عليه

□□□□□□□□

صادق امين العدا بأخلاقه شهدوا
في الكرم كان ريح بترسل خير
بيكفي المحتاجين

صلوا عليه

لو كان حبيبنا وسطنا كان حالنا ايه
يا كل احباب النبي صلوا عليه

□□□□□□□□

بالكذب ما ينطق لسانه حتي قبل ما كان رسول
والحق زى الشمس ساطع في كل الفصول

حبيب الله صلوا عليه

لو كان حبيبنا وسطنا كان حالنا ايه
يا كل أحاباب النبي صلوا عليه

□□□□□□□□ □

عدل زى السيف ما فرقش ما بين مسلم وكافر
نصر اليهودى على المسلم عشان مظلوم
ساوى ما بين كل البشر والحق بان

صلوا عليه

لو كان حبيبنا وسطنا كان حالنا ايه
يا كل أحاباب النبي. صلوا عليه

□□□□□□□□ □

لو صمت صمته وقار ولما يتكلم من غير صخب
كلامه يشفي. المجروحين

صلوا عليه

لو كان حبيبنا وسطنا كان حالنا ايه
يا كل أحاباب النبي صلوا عليه

□□□□□□□□ □

علمنا يعني ايه جبر الخواطر
والرحمة في قلب الغني لاخوه الفقير
الرزق بالصدقة يزيد
ويوم الحشر الصدقة تظلك وتحس بأمان

صلوا عليه

لو كان حبيبنا وسطنا كان حالنا ايه
يا كل أحباب النبي صلوا عليه

□□□□□□□□□□

البسمة ما تفارق جبينه ووجهه نور
يهدى الحيارى ويحضن القلب الحزين

صلوا عليه

لو كان حبيبنا وسطنا كان حالنا ايه
يا كل أحباب النبي صلوا عليه

□□□□□□□□□□

قلبه أبيض خالي من أي كره
عفو ومحبة حتي ع اللي أذاه مسامح
رحمة ربي للعالمين

صلوا عليه

لو كان حبيبنا وسطنا كان حالنا ايه
يا كل أحباب النبي صلوا عليه

□□□□□□□

رسالته هي الخاتمة
وفي رحلة الإسراء صلى امام بالأنبياء
ويوم الحشر باب الجنة يتفتح لخير الأنبياء

صلوا عليه

لو كان حبيبنا وسطنا كان حالنا ايه
يا كل أحباب النبي صلوا عليه

□□□□□□□

مولود يتيم وقلبه بيفيض بالحنان
وفي فتح مكة يوم النصر ع البهتان
خفض راسه وقال بكل العفو والتحنان
اذهبوا فأنتم الطلقاء

صلوا عليه

لو كان حبيبنا وسطنا كان حالنا ايه
يا كل أحباب النبي صلوا عليه

□□□□□□□

شفاعته شالها لأمته يوم القيامة

عالحوض هيبقي في انتظارنا
يروى عطشنا يضمنا
ولو نعيش على سنته ما نشوف ندامة
ونكون معاه

صلوا عليه

لو كان حبيبنا وسطنا كان حالنا ايه
يا كل أحباب النبي صلوا عليه

□□□□□□□□

وهو بين أصحابه كان مشتاق لنا
وقال علينا أحبابه كان بيحبنا
تعالوا نسأل نفسنا
تعالوا نسأل نفسنا
انت مشتاق للنبي

صلوا عليه

لو كان حبيبنا وسطنا كان حالنا ايه
يا كل أحباب النبي صلوا عليه

□□□□□□□□

شدي حيلك

شدى حيلك مدى طولك

انتي عالية ومين يطولك

التاريخ بدايته ارضك

والحضارة هي فرضك

والحياه في طولك وعرضك

عمرها من عمر نيلك

شدى حيلك

يا بلادي يا هنية سمرة الطين البهية

نسمة صافية في العصارى

نيل بيجرى في السهول ويا البرارى

والندى في الصبح يضحك لما ييزوق زهورك

شدى حيلك

ساقية التاريخ بتشهد

انتي يا بلدى الكبيرة

مش بطولك ولا عرضك
لأ بطيبة قلب شعبك
إيد بتبني وايد بتحمي
والعدو ناره ما تهمد
انتي نجمة ومين يطولك
شدى حيلك
انتي حصن للغلابة
طينك واحة شقيانين
تحضني بحنان وطيبة
الشهامة هي وصفك
والمروءة هي أصلك
في الشوارع والحواري
والمزارع والقهاوى
تحكي للناس انتي مين
وترابك يا حبيبة
عطره عرق جبينك
شدى حيلك

انتي مهد لكل دين
والحق وصفك في كتابه
ادخلوها امنين
وان بعدنا غصب عنا
ليكي يطوينا الحنين
ولما يندهنا ترابك
نقتل الغربة ونيجي لك
شدى حيلك
فداكي روجي يا حبيبي
ده انتي مجدافي وسفينتي
دم الشهيد عطر ترابك
عزة مسحت حزن صابك
لجل علمك يبقي عالي
ليكي يرخص كل غالي
ولا دمعة تمس عينك
شدى حيلك

وردة

لوتسمحوا ليّ أنا وإخواتي أربعة

عايشين في شقة محندقة ومربعة

بابا من الفجرية صاحي ما هو أصله عامل مطبعة

شقيان لكن شهم وجدع في الحتة سيرته مسمعة

وماما شايفة الويل معانا حنان وطيبة ومجدعة

كمان معانا جدو وتيتة عيلة صحيح متجمعة

تيتة طويلة حبتين بتنام على سريري وهي مربعة

أما جدو يا دوب في طولاي نايم بقي ببرطعة

بيتنا صحيح أوضة وصالة لكن الضحكة ملعلة

قديم لكن ونس حيطانه مليانة شقوق متصدعة

وتد ما تهزه ربح الكره ولا قسوة في قلوب متشعبة

ده أغلى عندي من قصور فيها الوشوش متصنعة

وردة زمانه

تعالوا بقي نقفل باب العيلة شوية

دوشة وزحمة فيها حنية

في المدرسة مزنوقة في تختة ورا باب الفصل إنما إيه

ومدرس مطحون من الدوشة بس الحب مالي عينيه

اسكت يا إبنى فاهمة يا بنتي والطباشير علم في إيديه

ولما الواحد منا بيغلط في سؤال يتلفت حواليه

الخرزانة جاهزة بسرعة من الأستاذ هترف عليه

في الفسحة تلمنا غديوة كله بيدفع ربع جنيهه

في السوق البياع يوزن لك والبركة كانت مالية إيديه

شوارعنا زحمة لكن رحمة وناس بتساعد من غير ليه

والجار يسند جاره وقلبه بيدى قبل إيديه

دى كانت وردة زمن **الحب** كبرت دبلت

آه يا خسارة كبرت ليه آه يا خسارة دبلت ليه

إلى لقاء عند البحان

وداعاً زهرتي

وداعاً طفلي وداعاً بلا أحزان

حبيبة حبيبة عمري

زهرة أيامي والشيطان

لا أبكيك أحبك ربك

واصطفاك في رمضان

لن أذكرك فما نسيتهك

فهل ينسي الطير الأغصان

لن أنسى خضرة عينيك

ضحكة شفطيك والأحضان

صوتك يدوي في أرجاء البيت

لعبك تسمعه الجدران

طيبة قلبك ضحكك لعبك

ومناوشتك للجيران

ألهذا الحد أحبك

ألهذا أحبك ربك فلا أحزان

ليلة قدرى ليلة قدرك

أعلى فيها ربي قدرك للجنان

طفلة شهيدة صفحة بريئة

بلا خطيئة ولا عصيان

فاضت لبارئها خفيفة

لا ثقل. لا خذلان

روح طيبة بين ملائكة الرحمة

بعد التهجد والقرآن

أشرق الفجر حبيبة

وقد صرت لدى الرحمن

يا زهرة عمري يا فلذة كبدي

يا شهيدة رمضان

لا لن أقول وداعاً

ولكن إلى لقاء عند الجنان

إلى لقاء عند الجنان

أحلام مساء

اشتقت إليك حبيبتي شوق الظلمة للضياء
اشتقت إليك يا ابنة عمري شوق أمل للرجاء
اشتقت إليك يا زهرة لم يمهلها الارتواء
تطوف بي الأفكار تهدهدني يوم ولدت صفت السماء
أول كلمة نطقها أول خطوة خطوتها أول حذاء
أول أيام المدرسة ربطة شعرك ربطة عنقك والبكاء
ضحكك. لعبك ومناوشتك للجدة كل مساء
وإن أخطأت يقول أبوك دعيها حتي المساء
ويأتي المساء تلو المساء ومساء أبيك أبدا ما جاء
وكبرت سلمتي نمت زهرتي ملأت ضحكتها الأرجاء

سلمي راحت سلمي عادت قد تهادت في حياء
وتعود بي الأفكار تبعثرني وتذكرني بليال شقاء
رحل الزوج سقط الدرع مال الظهر بحملي ناء
أظلمت الدنيا من حولي وكنت يا سلمي خيط ضياء
أحبيتك زهرة أيامي حب الدفاء بليل شتاء
أشتاق إليك شوق الغصن لنسيم هواء
أشتاق إليك شوق العطش لقطرة ماء
شوق المسكين لأي عطاء
شوق القلب لدفق الدماء
أنا لا أبكيك فربي أراد ذاك وشتاء
واختارك مع خير شباب لتكونوا من الشهداء
وحين تنهشني الوحدة أصبرها بيوم لقاء
يلفك قلبي تحتويك ضلوعي وأفيق وهي أحلام مساء

في العتمة شمعاية

إلى الأب الكريم الراحل الأستاذ/ أحمد أبو العدل

ووسط العتمة شمعاية	في عز الشمس ضلالية
وتلقي عصايته ضحكاية	ووقت الشدة ما يأذى
يتابع كل تفصييلة	وف مدرسته من بدرى
يصحصح أي تكسييلة	بعزم وهمة في طابوره
بناته بكل حنية	وزى الأب ييراقب
بتواضع مش بنديية	بحكمة وحب يعاملنا
علينا انت ليك الفضل	هتوحشنا بقولها بصدق
اسمه أحمد ووصفه أبو العدل	بتسألوا مين أنا أقصد

غمض عينك

غمضن عينك بسن شوية
شکل حياتك من غير مائة
ويلا اتخيل ايه هيكون
دمك في عروقك يتجمد
وفينك يا مسكين هتكون
يللا بسرعة قول واتأكد
وكمان قلبك مشن رح ينبض
لا هتلقى كهربا من سد
إن أنا نعمة ربك واسجد
الدنيا من حواليك فاضية
ولا حيوان ولا أيها حد
وتخيل كده لو من غيرى
صحرا وعممة مالهاش حد
ولا زهرة تضحك في عيونك
ممكن تلقى نبات أو خير
وبضايع مشن رح توصلك
ولا هيرفرف فوقك طير
ولا غاز ولا بتبول هيعدى
لا هبقي بيع ولا تصدير
دلوقتي فتح لي عيونك
ولا سفينة في قناة هتسير
واشكروا حمد نعم الله
واستعملني برفق شوية
واشكروا حمد نعم الله
واعرف بقي ان املاية

هي دي سر الحياة

راجع

راجع فرخ الحمام ثاني يحضن الفية

راجع فجر الأمل يشق ليل غربتي يعيد الضحكة لعينيا

سماز وجهه بيلمع بدر على الماية

عاد الغريب يا ناس فارد شراع الأمل بين المراكبية

الفكرة من راسه والقمح من فاسه

وعرق جبينه بيغزل توب صلاة أبيض وسبحة فضية

الوجه سيناوي والقلب بحراوى ومن الصعيد راجع بغنية

توب شاهق كما الحليب ما تشوبه عصبية

هرم شامخ ونيل يجرى يرمي الخبث ويطرح خير وحرية

في قلبه يا شمس

يا نور العيون في قلبي يا شمس
يا أمي الحنون . يا أختي وبنتي
يا حربي وسلامي في قلبي يا شمس
يا ليلي اللي دافي بشلة صحابي يا خطي وصوابي
خدتي سفينتي لغربة وشجون ولقمة هنية تملى البطون
ثمنهم يا شمس كرامة تهون للقمة وقرش
قلوب من حجر بتعرف تخون تعبت في غربة ومتاهة بشر
حنيبي في قلبي أداريه وأصونه تمرى في خيالي دموعي تخونه
بعيدة ومعايا يا بردى ودفايا يا أجمل قدر
وزادى اللي باقي في سكة سفر يا ضحكي وبكايا

سافرت وسبيتك بعدت وما بعتك
تعبت في بعدك مفيش حزن بعدك

يد اوي السهر

راجع لك يا شمسي يا بكرة وأمسي
حقيقة وحدس وتراب مندي بحبة مطر
راجع لك يا شمسي راجع لك يا شمسي
يا أرضي وسمايا يا ليلي وضحايا

يا أجمل مدينته رأها بشر